

1 Corintios

Pablo pørøb

1 ¹Na Pablo, Tius nan trendø treeg kønrrain køben, Cristo Jesús nøashib karua ørig kønrrai wamig, nai nuneg Sóstenesba misra, i kilgawan pørar, ²Corintosrø iglesiyuelan, Cristo Jesúskurri tru Tiusweyasig tarømariilø, nuyasiitø newan tabelø kønrrai wamiilanba, katø tru mayeelø chutøgucha namui Señor Jesucristoi munchiwan wamabelanba, truike namuimba, nømuimba Señorwan. ³Namui Møskai Tiusweimba, Señor Jesucristoimba tru ka yandø tab indigwan køben, chi isumgaig tab købigwan køben ñim tøgagønrrai inchar.

Cristogurri tabig tranigwan ‘ungwa, ungwa’ taig

⁴Chu urastøgucha nabe Tiuswane ñimuimburab ‘ungwa, ungwa’ chibig kur, Cristo Jesúskurri ñimun Tius ka yandø tab indigwan tranikkurri. ⁵Kaguende chiyutøgucha ñimbe nuinug purø norrø tøgagønrrai traniilø køn, kerrigu wamindigu lata, kerrigu nebua ashib ambigu lata. ⁶Trumay Cristoi tru srøig tabigwan wamindiibe ka wamindiitø kømø, ñimuinuube cierton kørrømisrin køn, ⁷Tiusweiwan marøbelø kømigwan keta tranig chigucha chi palømeelø kømnegatikke, Jesucristo kenamisramigwan ñim munig melappe. ⁸Katøgucha srabegatig ñim kørrømø mur pønrrønrrai nøbe tōga pasrønrrun, namui Señor Jesucristo katø arrub kwaløm chi kaig mariilø chigar pønrramig kønrrai. ⁹Tiusbe nøbe maig martrab chippe, treegwan marøbig køn. Ñimbe nøgurri wamiilø kuig køn, nui Nusrkai Jesucristo namui Señorba lincha pønrramig kønrrai.

Corintosrø Tius wami misaamera nørøtø inchib tarømisrøb

¹⁰Nai nunelø, Señor Jesucristoi munchiyu maig maramigwan tiusmanda øyeeeg marøb melørrunrrigay chib waminchab inchar. Peg peg isub kømøtø, kandø isuy cha, ñimui utu mas nørøtø inchib tarømisramig kaanrrai. Masken treeg kømøtø, newan kanbalatø lincha kandø isub, maig marameløyu kandø isub inchigay cha. ¹¹Nai nunelø, møiløgøsrøn Cloéwei yaeløbe nane eshkatan, ñimbe kwayam labrre waran cha. ¹²Pøs nabe trenchinrrab inchar, møiløgøsrøn

ñimbe trenchibrren kòn tan cha: “Nabe Pabloingatiig kur” chiben, katøgane: “Apolosweingatiig kur” chiben, katøgane: “Nabe Cefasweingatiig kur” chiben, katøgane: “Cristoingatiig kur” chib. Treeg inchib kòn tan cha.

¹³Trube, treeg købene, ¿Cristobe nuin kui, nuin kui misra pasra chindah? Kabe ñimuyasig kurusyu kwanrrai mesrøppe, ¿na Pablon mesraig kø chindah? Kabe ñimun piu umbu ulsrøbgucha ¿nai munchiyu piu umbu ulsraig kø chindah? ¹⁴Tiuswan nabe ‘mayanguen ungwa, ungwa’ tamønrrun, ñimun møigwangucha na piu umbu ulsrømuigwan. Nabe piu umbu ulsrøppe, Crisponbah, Gayonbatøwei treeg marig kuig kòn, ¹⁵nai munchiyu ‘piu umbu ulsrailø ker’ chib mugucha trenchib kømønrrai. ¹⁶(Katø Estéfanaswei yauelandøbe piu umbu ulsrøbwei indig kòn. Inchendø katøgan mas mungucha piu umbu ulsraibe nane isumøtan). ¹⁷Kaguende nane Cristobe misagwan piu umbu ulsrøb uñchai ørmøtø, Tiuswei tru tabig srø wamwan eshka kusrenanrrai ørig kòn. Incha nabe waminchibgucha, nørø wammeratøga purø may waminchimur, Cristo kurusyu kwaigwane chigucha kømíig kui lataig marig kømønrrai.

**Cristobe tru Tiuswei muguen nebua kusremgaig
kusreiba, maramburab mariiba kòn**

¹⁸Cristo tru kurusyu kwaigweimburab tru eshka kusrenaniibe yandø tru kaigyu kegørra pønrrabelaimbe chigucha kømíig, ke chugúinguen mormubendø wamindi lataig kòn. Inchen nam yandø kaigyugurri wesrailaimbe tru wamindiibe Tiuswei tru maramburab marig, truig kòn. ¹⁹Kaguende trenchibig pørig pasran:

“Purø kusreb møguelø chigurrimbunø nebua kusrewa tøgagúilane pinisamønrrun cha.

Kusrebelø nøm chigúi møra tøgagúilane chigucha kømíig mara kaasha kørøramamønrrun” chibig

²⁰¿Pøs, tru purø kusreibiiba, katø kusrennøbiiba, katø mõi i kwaløm nørø kusrewa ‘treeg, treeg kòn’ chibeløbabe chu pønrrah? ¿yu pirau chine purø nørø kusreigwane chugúinguen mormubendø marig, Tiusbe treeg mara tøgagømitarru? ²¹Kaguende Tiusbe, tru nui muguen nebua kusremgaig kusrebig kuigu, yu pirau misaamerabe nømui tru purø nørø kusrewa tøgagúitøgabe nun nebua ashmønrrai indig kòn. Pøs tru chugúinguen mormubendø wamindig mara tøgagúigwan eshka kusrenaniitøga nun kørebelane kaigyugurri wesramig, Tiuswane tabig asønaig kòn.

²²Kaguende judíosmerabe kan møg Tius nøba pasrain kui ashchai mariilan miaben, griegosmerabe tru purø nørø kusreig wamindiilan mørøg kui inchibelø kòn. ²³Trune nambe Cristo kurusyu kwaigwan eshka kusrenanøbelø ker. Trube judíosmeraimbe ke ka srørengwangerubig køben, judíos kømø misaameraimbe ke chugúinguen mormubendø wamindig, treeg kòn. ²⁴Trune Tius tru wamiilayasiibe, judíosmerai lata,

griegosmerai lata, Cristobe tru Tiuswei maramburab mariiba katø Tiuswei tru muguen nebua kusremgaig kusreiba, truig køn. ²⁵Kaguende Tiuswei tru chugúinguen mormubendø wamindi lataig asonabiibe móguelø purø may isua wamindi lataig kømøtø, mas purab nuig køben, katø Tius tru itønaptiig lataig kuibe, kan møwei fuerzas lataikken kømøtø, purab murikken køn.

Corintosrø Tiuswei misaamera mailø kuig

²⁶Inchawei, nai nunelø, tru ñimun wamab uras ñim mailø købelø kuigwan isua asamig køn. Misaamerain kabyu kusrebeløbe ñimbe ke kan kandøwein køben, katø ashib karub purrabelø nørreeløbe mamdø køben, katø tab misagugurri amrrub misaamerabe mamdø køn. ²⁷Yu pirau chugúinguen mormubendø wamindi lataig tøgagúigwan Tiusbe truigwan wesrawa pasrig køn, tru purø nørø kusrebelan kørig mara kørromartrab. Katø yu pirau kwa kaizheelø kønmab asha tøgagúilan Tiusbe truigwan wesrawa pasrig køn, nørreelan kørig mara kørromartrab. ²⁸Yu pirau misagwein kabyu larrø kaizheelø kønmab asha tøgagúilanba, katø kaashib indiilanba, tru chigucha kømøzheelø kui asiilan, Tiusbe truilan lawa wesraig køn, tru nørreelan chigucha kømeeelø mara kørromartrab, ²⁹mugucha Tiuswei merrab nørreelø misrøb møg inchib pønrrømønrrai. ³⁰Ñimbe Tiuskurri Cristo Jesúsba kanbalatø pønrran. Cristo Jesúsbe namuimbe tru mu nebua kusremgaig kusremiba, katø sølgandø tabiiba, katø Tiusweyasiitø tarømariilø kømiba, kaigyugurri wesruilø kømiba, treeg køn nøbe. ³¹Inchawei Tiuswei wamwan pørigube trenchibig køn: “Møikkøben truba nuig kømmørø inchib waminchib pasrag købene, Señorweimburappe møg inchib waminchib pasrøbash” cha.

Criston kurusyu mesraigwan wamindig

2 ¹Inchawei nai nunelø, Tiusweimburabig mun kenamariimíig pasrabigwan na ñimun eshkaib kusrenanøb arrub urasma, ke kan chull møramdiig purø may waminchib, katø purø nørø kusreb nebua asiilan waminchib arrumuig køn. ²Pøs nabe ñimui utube katøgan chi pegwan isub pasrønrrab kømøtø, Jesucristonba, nun kurusyu mesra kweetsigwanba, trunundø isua pasrønrrab isuig køn. ³Incha nabe ñimui utu uñib urasbe truburab chish kømøwei, trurrigu kørig kuig ¡katø! itønab pasraig købig køn. ⁴Inchawei na wamindigu lata, katø Tiuswei wamwan eshkaib kusrenanigu lata, purø nørø nebua ashib kusreig wamdøga purø may køremdiig waminchimuiig køn. Treeg kømøtø, Tiuswei Espíritui maramburab mariitøga kenamarøb wamindig køn, ⁵tru ñimui isubigwan Jesucristoinuutø pasriibe móguelø purø nørø kusreigu pasrig kønrrain kømøtø, Tiuswei maramburab maramigu pasrig kønrrai.

Tiusbe nui Espíritugurri nebua ashchai marøbig køn

⁶Treeg kuingucha, Tiusweimburabeløyu yandø tsabø nørørawarwei utubeguende nørø nebua kusreigwan waminchibwei inchibelø ker.

Nambe waminchippe, tru nørro nebua ashib kusreigwan mõi nam warain kwalømigwan kømøwei, kabe møin kwaløm yu pirau nøm ashib karubelø nømguen patsab ambubelaiwan kømøwei wamindig køn. ⁷Treeg kømøtø, nambe waminchippe, Tiuswei tru muguen nebua kusremgaig mu asiimíig, sørig pasrabigwan wamindig køn, tru chi pønrrabikken kaabenbatørsøwei namuyasig maya nuguen tab kønrrai kanmaytø manasøwei Tius treeg martrab isua tøgagúigwan. ⁸Inchen mõi yu pirau nørreelø karub purrabeløbe møitøgucha iig tru muguen nebua kusremgaigwane chigúinguen mørmuig køn. Pøs iigwan chigúí mørig kuimbe, namui Señor tru tørguegwalmabigwane kurusu mesra kweechimubsruig kuinrrun. ⁹Inchendø Tiuswei wamwan pørigu taimbala:

“Mugucha kaptøgabe nebua ashmøwei,
muguen kalutøgabe nebua mørmøwei,
ni muguen øyeeg kuitamme isubguen isumøwei indigwan,
Tiusbe nun undaguelayasiibe trunun tøgagønrrai tamara pønrrain
køn” cha.

¹⁰Inchendø Tiusbe sørig pasrabigwan nui Espíritugurri namune kenamarig køn, kaguende tru Espíritube maig kuigwan kerriguh chishtø ashibig kua, Tiuswei tru muguen nebua asiimíig nø purø umbusrø tøgagúilanguen kerrigu. ¹¹Pøs ¿kan mowanma nui manrrau umbusrøngue chi isub pasraigwan nebua ashibiibe nui espíritutøweimbe nebua ashmuitarru? Øyeetøwei Tius nø purø umbusrø tøgagúilane mugucha nebua ashmuben, Tiuswei Espíritutøwei nebua asan. ¹²Nambe espíritu yu pirauigwan utømøtø, utappe, Tiusweinukkurri arrubig Tiuswei Espíritun utig køn, nø ka yandø keta tranigwan chigúí mørøbelø kømig kønrrai. ¹³Inchawei nam iigwan waminchippe, møguelø yu pirau kusremburab kusrebelø kusrenani wamdøga waminchimer. Treeg kømøtø, Espíritu Santo kusrenaniitøga Tiusweimburabelan øyeeg køn chib waminchippe, Espíritu Santon tøgarmen waminchibelø ker.

¹⁴Kan møg Tiuswei Espíritun chigaibe, Tiuswei Espirituimburabigwane utønrrab kaiman. Pøs nuimbe ke chugúinguen mørmubendø mari lataig køben, ni mandø kuinguen mørmøn, kaguende Espíritu Santo purugubendøwei, øyeeg, øyeeg købig kuin kui nebua asamig kua.

¹⁵Inchen Tiuswei Espíritun tøgaiibe chiwandøgucha øyeeg, øyeeg købig kuin kui nebua isumig tøgagig køn. Inchen nungurrimbe mugucha ‘øyeeg, øyeeg køn’ chinrrab kaimanrrun. ¹⁶Pøs Tiuswei wambe trenchibig køn:

“¿Señorwei isuilan kabe mu nebua asitarru? cha.
¿Señorwane kabe mu kusrenrrautah?” cha.

Inchendø nambe Cristo nø isuimay isumigwan tøgær ker.

Tiusweimburabeløyu lincha maram purugubelø

3 ¹Inchawei nai nunelan, nabe Tiuswei Espiritu maig kønrrain køben treeg isubelan lataig waminchab kaimaig kuig køn. Treeg kømøtø, tru maig amøñig køben amøñibelan lataig, trumay wamindig køn,

Cristoimburabigube kan shush ureezheelø latailan. ²Nabe ñimune pitsøtø mutsøstraig køn, tranrrø mamig manrrai manmøtø, kaguende katøgucha truigwane utønrrabgailø srø kuimba. Ni mõi yanguen katøgucha treeg mamigwane manrrabgailø srø kua, ³katøgucha ñimbe ñimui asr maig marøg kui inchen treegwan marøbelø srø køn. Pøs ñimui utube pusrkwai ashib kømig, aleguiyam lab treeg inchib pønrraibe, ¿ñimui asr maig marøg kui inchen treegwan marøb, maig købash amøñibelø lataig marøb amøñimøtirru? ⁴Kaguende ñim mõiibe: “Nabe Pabloingatiig kur” chiben, katøgane: “Nabe Apolosweingatiig kur” chiben, øyeeg inchib pønrrappe, ¿maig amøñig køben amøñibelø lataig marøb pønrrømøtirru?

⁵¿Trube, treeg købene, na Pabloa, Apolosbabe chimera købrah? Pøs nambe ka marøb melabeløtø køben, ñimbe namgurriwei kørewa pønrran, namun møigwandøgucha Señor maig martrai karua pønstraig køben, treegwan marøbelø. ⁶Nabe ellguaben, Apolosbe pi kuchen, tru tusrwan nurangaruppe, Tius nø nurangarun. ⁷Inchawei ellguabig lata, pi kuchibig lata chigucha kømeelø køben, kal-lawa nuranrrai marøbiibe Tius, nø køn. ⁸Ellguabig lata, pi kuchibig lata, mõiibe kabe peg kønrrab kuindø trunundøwei marøb køn. Inchendø nøm møitøgucha nømui maramigwan maig marig køben, Tiusbe tru marimburo pagaraben, utønrrab kuinrrun. ⁹Kaguende nambe maramigwan Tiusba lata lincha maren, ñimbe Tiuswei ellmari tul køb, katø Tiuswei ya køb indan.

¹⁰Tius nui ka yandø tab indigwan nan maya traniitøga, kan møg yawan puro may maram kusrebig lataitøwei yawan niga pasønrrabigwan nabe pølbasra pasren, katøgane tru na pølsrugwan mara pasrim pala, kusrub yan. Inchendø møitøgucha marøb ambuppe, mandø marøb yainatashchab asha maramig køn. ¹¹Pøs kaguende yawan niga pasønrrabigwan chab marig pasrøbene, mugucha katøgane katø srøig peg nøørø maramig kømøn. Kaguen tru chab mara pasriibe Jesucristo køn. ¹²Inchen tru yawan niga pasønrrai pølbasra marim palabe: orotøga marin kui, andøga marin kui, kabe puro tab sruuzheeløtøga marin kui, tsiitøga marin kui, putøga marin kui, kabe ka shautøgatø marin kui inchen. ¹³Inchen tru nøm treeg mariiløbe møigweindøgucha tørgandø chigúi asamdiig kenamisrtrun tru maig kønrrabigwan asha marøb kwaløm. Kaguende maig køtashchab naatøga parra ashen, tru naabe kanuin kanui nøm maig marigwan chigúi ashchai kenamartrun. ¹⁴Inchen møikkøben tru yawan niga pasønrrabigwan marim pala nø marøb kusrab yaig chi kømø, nagu ka puraibene, truburo nøbe tru utamigwan utønrrun.

¹⁵Inchen møigwein køben nø chi marøb megaig pachiptinchene, tru nø treeg marigwane kaptøashchun. Nøbe truyugurri weluløppe, weluløbwei inchendø, treetøgucha welulrrab kan nag pilab utuwan purøluløb ib lataig welulabe kønrrun. ¹⁶¿Ñimbe ashmeelø køtirru? yamba ñimdøweinguen Tiusweimbe tab ya køben, Tiuswei Espiritube ñimuinug pasrabig kuin kui. ¹⁷Inchawei møikkøben i Tiuswei yawan

pinishibigwane Tiusbe nungucha pinishinrrun. Kaguende Tiuswei yabe newan tabig nuyasiitø køben, tru Tiuswei yabe ñimðøwein køn.

¹⁸Kusrebelø kermab ñimasiitø kegørrab pønrrømøtay. Ñimui utu mōikkøben misaamera mōin kwaløm yu pirau isuigu truba truba nu kusrebig kurmab isubiibe, chi nebua ashmíig lataig misramig køn, cierton kusrebig kønrrappe. ¹⁹Kaguende kusremburab kusreig yu pirauibe Tiuswein kabyube ke chugúinguen marmubendø marig treeg køn. Pøs øyeeg chibig pørig pasran: “Nøm truba truba kusrebelø kermab isuigtøwei Tiusbe iløsrka kegørrønrrai marig køn” chibig. ²⁰Katø treekkucha chibig køn: “Señorbe ashibig køn cha, tru nørrø kusrebelai isuiløbe chi isumuinguenig isuilø kui.” ²¹Inchawei mugucha, ø møøbesin chib, truba truba møg inchib waminchib pasramibe chigagøn. Pøs kerriguba ñimuin køn: ²²na Pablo lata, Apolos lata, Pedro lata; iig waraig pirø lata, øsig kømig lata, kwamig lata, mōin kwaløm lata, katø wendø attrabig lata; pøs ñimuiwein køn kerriguba. ²³Katø ñimbe Cristoielø køben, Cristobe Tiuswein køn.

Cristo nøashib karua øriilø nøm marøb kuilan waminchibig

4 ¹Ñimbe mutøgucha namune Cristoi maramigwan marøb, katø Tiuswei tru mu asiimíig sørig pønrrabigwan nam asha marøb, kusrennøb pønrrønrrai pønrsailø kui, namune ka treetø isua tøgagørrunrigay. ²Pøs tru maramigwan nøm asha marøb kønrrai pønrsrainabeløbe mōitøgucha nui mariiløyu chi isumgaig marøbelø kønrrain køn. ³Nane naimburappe, chi menrra isumøtan, ñim kui, kabe yu pirauelø mugøben tru maig kønrrabigwan asha marøb purrabelø, truilø kui, nan ‘ñibe øyeeg, øyeeg marøbig køn’ tainab pasramig. Kaguende nabe naasiitøweinguen ‘øyeeg, øyeeg kur’ chimur. ⁴Pøs nabe naimburappe, nai manrraube chi kalø marig kebachibiibe chigaig pasrar. Inchendø na treeg pasraitøga ‘chi kalø marmíig kur’ tamig kaagøn. Kaguende nan maig kønrrabigwan asha marøbiibe Señor, nø køn. ⁵Inchawei treeg købene, treeg maramig pumøwatøbe ‘ñibe øyeeg, øyeeg kuin køn’ chib, treeg kui mara kørørmarmøtay. Muniiray Señor arrumnegatig. Tru sørig pønrrabig løstøyuelan nøbe tøryu wesrawa, møguelø nømui manrrømerayu chi martrab isua tøgagúilan kuragutchun. Inchen mōitøgucha Tius tabig wamindig kømigwan utønrrun, nøm maig marig køben, treekke.

⁶Nai nunelø, iigwan kerrigu øyeeg pøroeppe, Apoloswanba, nanba asha kusrenrrai indig køn ñimuyasig tab kønrrai, ñim namun asha kusrewa, pørig maig chibigwan purab marøb pønrrømønrraimba, kanune kaig køn chib, kanuingatøgøba inchib ñim truba møg inchib nørreelø misrøb pønrrømønrraimba. ⁷¿Ñun mu kui nebua asig kønrraima ñune mu treeg mara pasrta? ¿Tius tranigwan utiimíibe ñibe chi tøgagugu? Inchen nø tranigwan ñi uta tøgagúig købene, trube, ¿chindimbarre møg inchib nuig misrku, tranigwan uta kømøwa lata?

⁸¡Paare, ñim waachaalleeløbe! Yandø ke newanelø, katø ñimbe yandø chiyutøgucha palømíg ke newan tøggar køppeendi, ñimbe namun palain kømø, yandø reymera, yandø ñimdo ke tsabø asha karubelø. ¡Kan waachaalleelø! Ñim isa kømøtø, reymera kua, ke ñim karub pønrraimbe, namgucha treetøweim pønrrønrrab, ñimba ke amøñigasamig køtan. ⁹Pøs nam Cristo nøashib karua øriilane yandø wendau ke srabesrø melab lataig treeg pønrrønrrai pønrrailø ker, yandø kwanrrai wesrawa pønrrailan latawei. Pøs nambe yu pirau mayeelai merrab misagashib srua kuilø kømig køtan, ángelesmera lata, misaamera lata. ¹⁰Nambe Cristoimburabikkurri ke chugúinguen mørmeelø lataitø køben, trune ñimbe Cristoimburabeløyu purø kusrebelø latailø køn. Nambe ke itaptø kaizheelø køben, trune ñimbe purø mur chibelø latailø køn. Ñimbe tabelø kønmab asiilø køben, trune nambe kaasiilø ker. ¹¹Pøs nambe møin kwalømgatig parøgwai mørøb, pi mulgwai mørøb øyeeg nebuig meler, asru kemig truburab kømuelø, ichabeta kørriindiilø, katø chu waramig ya kaweyelø. ¹²Nambe namui tasiimeratøga muraara, muraara marøbelø ker. Namune trømbøig tsalø wamøben, namgurrimbe nømune mayanguen tabig nebuilø kønrrai inchibelø ker. Namun kaig maringucha, namgurrimbe awentabelø ker. ¹³Namune kailø kønmab ashchai isa waminchen, namgurrimbe maig købash inchimø, tammay løtabelø ker. Nambe møi øyan kwalømgatig yu pirau yandø kaasha kørrømarig chilliirrsr kørreibig latailø ker, mayeelai kaasi shau.

¹⁴Nabe ñimun iigwan pørøppe, ka kørig martrab inchimøtø, masken tabig melønrrai waminchar, nai undaaraig uremera latailø kuimba. ¹⁵Pøs ñimbe Cristoimburabigu kusrenanøbeløbe diez milburab tøgagúindøgucha, kan møskai lataibe kandø tøga køn. Kaguende Cristo Jesúsweinuube Tiuswei tru tabig srø wamgurri nabe ñimuimbe møskai misrig køn. ¹⁶Inchawei nabe ñimun øyeeg marøb melørrunrigay cha waminchar, na maig marøbig køben, ñimgucha treegwei marøb kønrrai.

¹⁷Inchawei nabe Timoteowan ñimuimay ørig køn, nai undaaraig nusrkai lataig Señorwan maikkucha tarømisrmø megabigwan. Nøbe na Cristo Jesúsweimburab maig marøb uñibig kuigwan ñimun isunanrrun, na chutøgucha iglesiamørig maig kusrenanøb yailan. ¹⁸Inchen ñim møiløbe na ñimun ashchab arrumønrraitamab purø nørreelø misrøb møg inchibelø misrin køn. ¹⁹Inchendø nan Señor inrrain købene, peba ñimun ashchab arrua, nøm truba truba nørreelø misrøb wamindiilan ashmøtø, tru nømui marøb kuigwan asamønrrun. ²⁰Kaguende Tius nø ashib karub waibe wamindigu pasrømtø, maramburab marigu pasran. ²¹¿Nabe ñimuimay tsig srua arrumig palain køgøeh? ¿Kabe undag købiitøga larrø tammay waminchab arrumig palain køgøeh? ¿Ñimbe møigwan palaingøgue?

Møgueløba, ishumburmeraba trømbøig marmumigwan waminchibig

5 ¹Nimui utube ishumburmeraba, møgueløba trømbøig marøb kuigwan truba wam køn, ñimui utube møykkørørnbe panabusrandøwei pera tsuin kui, judfos kømeelø Tiuswan ashmø misaameraguen kan øyeekkatig trømbøig maramigwane purø trømbøig kui asha treeg marbasimíigwan. ²¿Trune treeg kømnebe ñimbe chi kømui lataig nørreelø misrøb ka møg inchippe pønrran! ¿Ashene, øyeeg pubene, ñimbe isuig kishibguen pønrrømø, chindah? Tru øyeeg kaig marøb møywane ñimui utugurrimbe wegutchai inday. ³Pøs nabe ñimba kømøtø, nai asr pasraigube yabsrø nøørø pasraindøgucha, nai isuigube ñimba pasrøwa, tru treeg kaig marøb møywane nun maig itø attrabigwan treeg kønrrai kørrømara pasrøbguen inchar, na ñimui utu pasrøwa lataitøwei. ⁴Namui Señor Jesucristoi munchiyu ñim tulundzunøben, na maig isubig kuigube ñimba pasrøben, Señor Jesúswei maramburab maramig truyu pasrøben, ⁵tru larrø kaig marøb møywane Satanás nø tøgagønrrai pasrtrigay, nui asrwan pinisaig kønrrai, Señor arrub kwaløm nui espíritune kaigyugurri wesraig kønrrai.

⁶Ñim nørreelø misrøb waminchib pønrraibe chi tabig kømøn. ¿Ashmeelø køtirru, harinayu levaduran lamøtø pusriitø maya sømarigwan larrøb pulingarubig kui? ⁷Tru kølli levadura lataig tøgagúigwan wegutsay, harina sømarig chi levadura larriimíig latawei ñim chishelø kønrrab, ñimbe yandø chabguen treelø kuig kōppe. Kaguende Criston, tru namui Pascua Fiestayu Ubisha-unø kweetsamig købigwane namuimburø kweetsig købig køn. ⁸Inchawei nambe tru Pascua Fiestan marøppe, tru kølli levadura lataigwan tōga marøb kømøgun, tru kaig martrabgøba isub, chine trømbøig maramigwangøba isub indi levaduran. Treeg kømøtø, tru pirri chi levadura chigaig lataitōga fiesta margun, tru pirriyu chi lindsayimíig chi sørig chigaig, ciertongue.

⁹Nabe ñimun kilgayu pørøppe, asrtōga trømbøig marøb ishumburmeraba, trømbøig marøb møgueløba linchimøtay cha pørig køn. ¹⁰Inchendø nabe igwan trenchippe, yu pirau tru Tiuswan ashmø misaameran truilaimburab waminchimur, tru ishumburmera lata møguelø lata trømbøig marøbelan, tru larrø pareelan, chi isa køben an nila wesrabelan, katø chiwangøben kan tius kui lataig inchibelan. Pøs treeg misaameraba kerriguwan linchimumig kuimbe, trube, ñimbe yu piraugurrimbe webambam neubsruiinrun. ¹¹Pøs nabe ñimun pørøppe, ‘ñimui nuneg kur’ chib pasrøbendø, menda ishumburba trømbøig marøptiig, larrø pariig, katø chiwan køben kan tius kui lataig inchibig, kabe isa waminchib wam kusruptiig, mutsiiraptiig, purø may isa nila wesraptiiba, øyeeløba lindamig kømøn cha pørar. Treeg inchibiibabe mabguen lincha mamumig køn. ¹²¿Pøs nagan Tiuswei misaamera kømeelø

nøoreelan kabe na asha marøb pasramig kuitarru? ¿Tru iglesiyuelan asha maramigwane ñim maramig kòmuitarru? ¹³Kaguende Tiuswei misaamera kòmeelø nøoreelane maig kònrrabigwan Tius nø asha martrab kuinrrun. Inchendø: “Tru ñimui utu tru larrø trømbøig marøb igwane ñimbe wegutsamig kòn” cha, trenchibig kòn Tiuswei wamwan pørigube.

Tiuswei ureemera ambugurri, igurri aleguiyab

6 ¹¿Maig marøb pønrrabelø kuaasamø, ñim møikkøben Cristogurri nui nuneeba aleguiyam laig tøgagua, Tiuswei misaamerainug kòmøtø, tru sølgandø tabigwan marmeelaisrø tru kwayam laigwan ‘tamara kettra’ chib, treeg inchib pønrrørrappe? ²¿Ñimgan ashmeelø kòtirru Tiuswei misaamerabe yu pirau misagwan maig asha maramigwan nømguen asha martrabelø kui? ¿Inchen yu pirau misaameran treegwan ñimnguen asha martrabelø kòbendøbe, trube, chigøben kwayam lailø yandøzhig pub arrubigwane treetøwei asha martrab kaimabelø kò chindah? ³¿Ashmeelø kòtirru ángelesmeranguen maig asha maramigwan nam asha martrabelø kuibe, mas yu pirau chigøben pub arrubigwandøbe chinchá asha marmønrrab kø? ⁴Inchawei tru kwayam lailø yu pirau chigøben pub arrubigwane iglesiyuelø kòmeelan ¿mandøgurri truilan asha martrai pønrsøbelø køh? ⁵Nabe ñimune kørig purørtrab trenchar, tru nunelai utu kwayam lailan maig kuigwan paya ashib martrabig chigúí mørøb isum kusrebig ñimui utube, ¡paare! ¿ni kandøguen mu kaagø chindah? ⁶Inchen kan treeg martrab isui urasbe kan nuneeba katøgan nuneeba kwayam lawabe, juezmeran ‘tamara kettra’ chib, eshka ambubelø kòn Tiuswan køremø misaameran.

⁷Ñimbe ñimuimburappe chiguen kòmø, yandø newan kegørra pønrran, ñimui ututøwei øyeeg kwayam lab pønrraikkurri. ¿Trembe ñimun sølwan marmø kalø marindøgucha, treegu ka puraambub melamdiig kòmø, chindah? ¿Ñimun isa wamincha nilindøgucha, trembe ka awentamdiig kòmø, chindah? ⁸Treeg inchibelø kui urasbe sølwan marmø ñimnguen kalø marøb, isa wamincha nilamba inchibelø kòn, kan trutøgucha nunelandøwei.

⁹¿Tius nø ashib karub waigwan tru sølgandø tabigwan marmeeløbe tru ketig utamigwan utømønrrabelø kui ashmeelø kò chindah? Ñimnguen ñimdøwei kegørrab pønrrømøtay: møguelø lata, ishumburmera lata trømbøig marøbeløba, chiwangøben kan tius kui lataig inchibeløba, itøløløpteeløba, møkkølig kòbendø ishug lataig inchibeløba, møgueløbe møgueløsiyaitø, ishumburmerabe ishumburasiyaitø trømbøig marøbeløba, ¹⁰nileeløba, larrø pareeløba, mutsiirapteeløba, isa waminchib wam kusrupteeløba, purø may isa an nila wesrapteeløba, tru Tius nø ashib karub waigwan truiløbe ketig utømønrrab kui. ¹¹Ñimngucha møiløbe merrappe øyeeløwei inchibelø kòbig kòn. Inchendø mømibe yandø chishtø pillmailø,

ñimbe Tiusweyasiitø tarømariilø, chi kaig kømeeelø lataig tabig kørømariilø køn, Señor Jesucristoi munchiyuba, namui Tiuswei Espiritugurrimba.

Asrbe trømbøig maramigweyasig kømøtø køn

¹²“Chiwandøgucha nan meriimfig, na ka maramdiig købendø”, kerrigubabe chi purugunrrabgailø køn. “Chiwandøgucha nan meriimfig, na ka maramdiig købendø”, na treeg marøb megamig kønrrai na øyeeeg marameløyu ni møyutøgucha truig srua yaig pasrønrrabgucha kømur. ¹³“Mamibe patsauweyasig køben, patsøbe mamigweyasig køn”. Inchendø Tiusbe mønundøgucha i pabaløwanba chigaanrrai pinishinrrab køn. Asrbe ishumburmeraba, møgueløba trømbøig marøb tøgagømigweyasig kømøn. Treeg kømøtø, asrbe Señorwein køben, Señorbe asrweyasig køn. ¹⁴Pøs Tiusbe Señorwanma katøle øsig kønrrai kusraig køppe, namungucha katø treetøwei øsig kømig kønrrai nui maramburab mariitøga kusranrrun.

¹⁵¿Ñimngan ashmeelø køtirru, ñimui asrmerabe Cristoi asrutøwei pønrrabelø kui? ¿Inchen nabe Cristoi asru pønrrabelan wesrawa, kan kaig ishug nui asrwan anwei yanøbigweinug kandø misrtraï mara, truyu pønstrønrraitamaguh? ¿Managuen treebe kømønrrun! ¹⁶¿Kabe ashmeelø køtirru, tru treeg kaig ishuuba kandø misra kaig mariibe, yandø kan asrtø lataig kørømisrig kui? Kaguende trenchibig pørig pasran: “Tru pailøbe kan asrtø kønrrun” cha. ¹⁷Inchen møikkøben Señorba kandø misriibe, nøba kan espíritutø køn.

¹⁸Ishumburba, møgueløba trømbøig maramigugurrimbe wegørray. Møguelø katøgan chinetø kalø mariiløbe nømui asrutøwein kømøtø, nøørø køn. Inchen ishuuba, møøba asrtøga trømbøig mariibe, nui asrwandøwei trømbøig maran. ¹⁹¿Kabe ashmeelø køtirru, ñimui asrbe Espíritu Santo nø kebya pasraig tab ya kui, ñimuinug pasrabig tru ñim Tiuswan uti Espíritu? Ñimbe ñimdøwei ñimuyasig kømøn. ²⁰Kaguende Jesucristo nuwei peniilø køn. Inchawei ñimbe ñimui asrtøga Tiuswan maya nuguen tabig indig kønrrai maray.

Kasharawarbe maig kømigwan waminchibig

7 ¹Trube, møimbe ñim nan kilga pøra paya ørig købigwan trencha løtønrrab inchar: Pøs tab køn cha, kan møg kasharamø, nøtiig kømig. ²Inchendø ishumburmeraba, møgueløba purø trømbøig marøbelø kuikkurri, møgueløbe møitøgucha nui srain tøgag kømig køben, ishumburmerabe møitøgucha nui keg tøgag kømig køn. ³Pøs keebe srawei asrwan tab kønrrai maramig køben, sraimbe nui keweï asrwan tab kønrrai maramig køn. ⁴Kaguende sraimbe, nui asr kuimba nuimburaaptø tøgagømig kømøtø, keg nø asamig køben, katø kekkurringucha nui asr kuimba nuimburaaptø tøga kømøtø, srai nø asamig køn. ⁵Inchawei tru ñim Tiusba wamindamigutø kebamrrab, kan maya yanagatig ñim pailø lata tru treegwan marmønrrab

wamincha kòmowabe, kanikkurri kanikkurri asrwan tranmønrrab inchimumig kòn. Tiusba wamindamigwan chab wamincha, trugurrimbe ñimui asrwane katø treetøwei tranamig kòn, tru treegwan marmuikkurrindø Satanás ñimun kegørrørskønrrab chigøben mara ashmønrrai.

⁶Nabe iigwane ka øyamay maramdiig kòn chatø eshkar. Ke treeg maramig kòn cha, karua pasrmøtø. ⁷Pøs maya møgueløba na lataitøwei nømdeelø kuimbemab isur. Inchendø møitøgucha tru nøm trendø treeg kømigwan keta tranig uta tøgar kòn Tiusweinukkurri arrubigwan, møibe øyamayig købene, katø møibe peemayikke.

⁸Nømdeelanba, piudameranbabe trendamønrrun: Na lataitøwei natø kørromisrimbe tab købsruinrrun cha. ⁹Inchendø kaig marmø uñibig uñchab kaimabiibe, kaig marøg købiitø ke chinsraatø inchib uñibgunrriibe kasharaikken søl kønrrun cha.

Kasharawarbe petiyamumig

¹⁰Inchen kasharawarmerane iigwan karua pasrar; na karua pasrig kømøtø, Señor nø karua pasrig kòn: Sraimbe kewane kuchimumig kòn cha. ¹¹Inchen srai kuchippe, trube, nøtø tsumig kòn. Trengømuppe, nui keeba katøle tammay kørromisra lindamig kòn. Inchen keebe nui srawane tarømisrøb kutsamig kømøn.

¹²Inchen katøganelane Señor trendaig kømøtø, naimburab na trendamønrrun: Møikkøben kan nuneg, nui sraimbe Tiuswan køremíig pera kua, nø ka lincha meganrrab megabene, keebe tarømisrøb kutsamig kømøn cha. ¹³Inchen kan srai, keebe Tiuswan køremíig tøgagua, nø ka lincha uñchab inchene, sraimbe tarømisrøb kutsamig kømøn cha.

¹⁴Kaguende tru keg Tiuswan køremíibe nui sraingurri Tius kaasiimíig køben, katø Tiuswan køremø sraimbe, nui kekkurri Tius kaasiimíig kòn. Pøs treeg kømumibe ñimui ureemerabe kaiba lindig købsruben, mømibe yandø Tius tabig kui asiilø kòn. ¹⁵Inchendø møikkøben tru pailøyu Tiuswan køremíig tarømisra ibene, ka ibasamig kòn. Pøs øyeegube, kan srai lata, kan keg lata Tiuswan kørebeløbe imønrrai inchib ke treegutø melønrraingucha pønrrailø kømøn. Kaguende Tiusbe ñimun wamappe, chi isumø pishindø tab waramig kønrrai wamig kòn. ¹⁶Pøs, ¿ñi sraimbe ashtirru, ñi ñui kewan inchippa kaigyugurri wesram kønrrab kui? Kabe ¿Ñi kekkucha ashtirru, ñi ñui srawan kaigyugurri wesram kønrrab kui?

Tiuswan ashibig maig kømigwan waminchibig

¹⁷Inchendø ñim møigwandøgucha ñimun Señor maig uñchai marig køben, treegutø unamig kòn, tru ñi Tiuswan nebua ashib uras maig købig kuibe, trumaytø ka unamig kòn. Chu iglesiamerayuelandøgucha iigwan øyamay marøb kønrrai nabe treeg karua pasrar. ¹⁸¿Tru ñui isubigwan Cristoing pasra tøgagønrrai wamab uras yandø circuncidaweikken købig køtirru?

Trube, circuncidaweig kòmønmap ashchai inchimøta. ¿Ñim møykkøben ñui isubigwan Cristoinug pasra tøgagønrrai wamab uras asru circuncidamíig køben wamig køtirru? Trube, treeg marmíig købig kuabe, circuncidanrrab inchimøta. ¹⁹Kaguende circuncidaweig kui chi kønrrab kòmøwein, circuncidamíig kui chi kønrrab kòmøwein køn. Tius maig maramigwan martrai pønrrailan møra marig, trube tabig køn. ²⁰Tius ñimun wamab uras møyttøgucha ñim mailø køben, treeg wamiiløbe, trumaytø ka kørromisramig køn. ²¹¿Tru ñun wamab uras karuindiig megabig køtirru? Trube, trunune chi isumøta. Inchendø ka karuindø megabig kòmønrrab indamdiig købene, trube, treegwan mar. ²²Inchen karuindiig megaben Señor waminabiibe, Señorweimburappe yandø webya pasran. Inchen katø treetøwei ka karuptø srua kuig megabig kòmøtø, nuimburab uñen waminabiibe, Cristo karuindiig meganrrabig køn. ²³Kaguende ñimbe Tius nuwei peniilø kuig kōppe, mōguelø karuindiig melabelø kòmøtø kuy. ²⁴Inchawei, nai nunelø, ñim møyttøgucha ñim maigu pønrrøben wamiiløbe, Tiusba treegutø ka kørromisray.

Nømdeelan wamindiig

²⁵Inchen tru kasharameelø nømdeelaiburappe, Señor nø karua pasriibe chigagur. Inchendø Señor nan lastima asigwan nebua tøgagúikkurri, na maig taigwan ñim treeg kuitamab isumdiig kuinawa, naimburab ñimun øyamay maramdiig køn chinrrab inchar. ²⁶Pøs møy ya øyeeg chinetø isumdiig købene, maig pasrabiibe trumaytø kørromisramig søl lataig kui ashar. ²⁷Inchen ñi srain tōgaig kuabe, trube, tarømisrtrab inchimøta. Kabe chi sraingaig, ñitiig kuabe, trube, srai tøgagønrrab lamøta. ²⁸Inchendø ñi kasharaikkucha, chi kaig marig kòmøwein køben, katø kan susrø kasharaikkucha, chi kaig marig kòmøwein køn. Inchen køben tru kasharabeløbe chinetø nebuig pønrramig arruben, isui melamig kønrrab køn. Pøs nane ñim treeg nebuig melai ashmuinrrabna kōtan.

²⁹Inchendø nabe, nai nunelan, ñimun trenchinrrab inchar: Srabe kwalømmera pumibe purø landøraim pasran cha. I landøzhig pasrabigwan Tiusweimburabigwan martrab, sralø tōgarbe sralø tōgar kòmøwa lataig pønrray. ³⁰Inchen truba isui kishib melabeløbe isui kishib pønrrømøwa lataig pønrrøben, truba kasrag pønrrabeløbe chi kasrag pønrrømøwa lataig pønrrøben, chigøben penabeløbe chigucha penømøwa lataig pønrrøben, ³¹katø yu pirau chine købigu tab kui mörøb amøñibeløbe ke truitø srua yailøgucha amøñimumig køn. Kaguende yu pirau øyeeg pasrabiibe ka pureb arrubiitø køn.

³²Nane ñim chigucha chi isumikkaig treeg amønaimbemab kōtan. Kaguende kan kasharamíig nøytiibe Señorweimburabigwan katøguchinguen isun, Señor tab kui wanrrai maramigwan. ³³Trune kasharaweibe yu pirau chigøben købigwan mas isun, nui srawan mandø tab kui wanrrai maramigwan. ³⁴Incha nø chi martrab isuibe pabalø, pabalø isuim

pasran. Inchen kan ishug kasharamíig, nōtiig, kabe kan srusrø nōtiibe Señorweimburab marøb megamigwan mas isun, nui asru lata, nui espíritu lata Señorweyasiitø kōnrrab isua. Trune kasharawa ishuube yu pirau chi kōbigwan mas isun, nui kewan mandø tab kui wanrrai maramigwan.

³⁵Iigwan na kerrigu ñimun trenchippe, ñimundøwei tab kōnrrai trenchar. Kabe ñimun ke truyutø iløsrka melønrraingucha inchimøtø, masken mumay amønamiigwan treeg marøb amøña, Señorweimburabigwan tab chi iløsrkaimíig marøb melamig kōnrrai inchar.

³⁶Inchen mu møøba kimø srusran kan mōg kasharanrrab misraig, nø tab marmurmab kōrig isub, katø tru srusrøgucha yandø kōligwein kōben, treekkurri møøbe yandø kasharam kui ashabe, trube, maig maramdiig kōben treeg maramig kōn. Treebe chi kaig marøb pasraig kōmøtø kōn. Ka kasharay. ³⁷Inchen kan mōg nui manrrau nø maig isuigwane treeg martrab kandø isua pasrabig, katø nui asru maig marøg kōbig arruben, truig mumaygucha srua irramamø, tru nø maig isua tøgagúigwan isua mōra tōga pasrøwa, tru srusrøba kasharamōnrrab nø treeg isua pasrabiibe, kasharamuig søl kōn. ³⁸Inchawei tru kasharanrrab misri srusrøba kasharaig sōldøwein kōben, katø kasharamuibe mas tabguen kōn.

Piudameraimburab waminchibig

³⁹Keg øsig uñene, sraimbe nøørø kōnrrab kōmø, kandø kōn. Inchen keg kwabeneguende, yandø nuin kuin kōben, mubagøben ka kasharamig kōn, Tiuswan ashibiibabe. ⁴⁰Pøs na isuibe øyeeg kōn: katøle kasharamø, nøtø kōrrømisrikken, mayanguen tab kōnrrab kui. Nagucha Tiuswei Espíritun tøgagurmab isua, trenchib pasrar.

Cierton tius kōmeelan trani yaumeran mandø indamigwan waminchibig

8 ¹Animalmera kweecha tru yauwan taska mari tiusmeran trana pōnsraigweimburappe nambe mayeeløba nebua ashibelø ker. Pøs tru nebua ashib kusreibe ka nørreelø misrøb pōnrrōnrrai maren, trune tru undag kōbig Tiusweinnukkurri arrubiibe Tiusweimburabigu nørøram purugubig kōn. ²Møikkōben maitøguen nebua ashibig kurmab isubiibe, tru maig kuigwan tab nebua asamigwane katøgucha tab ashmø srø kōn. ³Trune møikkōben Tiuswan undaguigwane Tiusbe nune mu kui nebua asan. ⁴Trube, tru taska mari tiusmeran pōnsraig yaumeran maigweimburappe ¿mandø chinrrab? Pøs tru taska mari tiusmerabe yu piraube chigucha kōmeelø kui nambe ashibelø ker, katø Tiusbe nøtø kandø kui. ⁵Pøs srømbalasarø lata, pirau lata tiusmera cha wamiilø møiløgøben kōbwei indan ('tiusmera kōn' cha, wamiiløba, katø chiwandøgucha nøm karub purrabelø cha wamiiløba truba nørø kōb lataitøwei). ⁶Treeg kuingucha, namuimbe Tiusbe kandø nøtø kōn, tru Møskai. Tru chigurrimbunø arrubiibe nuinukkurrindø arruben, katø nambe nuyasig øsig amøner. Katø Señor Jesucristo kandø kōben, chitøgucha kōbiibe nøgurriwei pōnrrøben, namgucha nøgurriwei øsig amøñibelø ker.

⁷Inchendø mayeeløbabe iigwane chigúí nebua ashmeelø køn. Møiløbe katøgucha tru taska mari tiusmeran tøgagøm kusreelø købig kua, tru mamimeran mappe, tru tiusmeran trani mamig kønmab isua mabelø køn. Incha tru nømui isub kebachib pasrabigu kullaguelø kuikkurri, yandø kaig maramab isub kørrømisrøbelø køn. ⁸Pøs mamibe Tiusweinug nam katøguchi kemalla pønrramig kønrrai marmøwei, katø nam tru mamuikkurri mas kailø misrtrab kømøwei, kabe nam truigwan maikkurri mas tabelø kønrrab kømøwein køn.

⁹Inchendø ñim tru chi kalø kønrraitamab isumikkaig marøb tøgagúigwane kullaateeløbe truyu srurrengwanrrain kømøtø ashiptø maray. ¹⁰Kaguen møikkøben nui isub kebachib pasrabigu kullaatiig tøgagig, ñi tru maig kuigwan yandø tab nebua ashib kusrebige, tru taska mari tiusmerai tab yausrø ñun mab wai ashabe, ¿nøgucha tru taska mari tiusmeran trani mamimeran ka manrrurmab isumønrrab køh? ¹¹Inchawei tru maig kuigwan ñi nebua asha kusrewa tøgagúig, truikkurrindø kan nuneg kullaatiibe yandø kebeña, pinab pinønrrun, Cristo nuyasig yamba purøgwaig købigwan. ¹²Inchawei øyamay tru nunelan kaig marøb, nømui isub kebachib pasrabigu kullaguigwan kørriincha kørrømarøb pønrrappe, ñimbe Criston kaig marøb pønrran. ¹³Inchawei mamibe nai nunewan kebenørskamitø kønrrab købene, managuen nabe yauwane mamumønrrun, nai nunewan ka srurrengwanganmønrrappe.

Cristo nøashib karua ørig maig marøb pasramig

9 ¹¿Maig maramdiig køben treegwan maramig nabe tøgagig pasrømubra chindah? ¿Nabe Cristo nøashib karua ørig kømubra chindah? ¿Kabe nabe Jesús namui Señorwan ashmuig kuig kø chindah? ¿Señorweimburab na marøb pasraigu yell kørrømisrøbeløbe ñimwein kømøtirru? ²Pøs møilaimbe nabe Cristo nøashib karua ørig lataig utig kømuinaindøgucha, isa kømøtø, ñimuimbeguende nøashib treeg karua ørig kur. Kaguende Señor nan nøashib karua ørig kui asamdiibe ñimwein køn.

³Nan møiløgøben ‘øyeeg marin køn’ chib, payibelane ‘øyan køn’ chib, kusra løtamønrrun. ⁴¿Kabe nam købgan mab, muchib indamig kømuitarru? cha. ⁵¿Kabe nam købgan Tiuswan ashibigwan srai mara, pera pønrramig kømuitarru? cha, tru katøganelø Cristo nøashib karua øriiløba, katø tru Señorwei trag nuneløba, katø tru Pedroba, truילו lataitøwingue. ⁶¿Kabe naba, Bernabébatøgan namui taska maramigwan elatsamig kømønrrain kuitarru, namui øsig waramig marøb kuigwan?

⁷¿Kan suldauma maig kuaasamø nø suldau pasraptøga, chi palabigwan nui andøgatøwei penabiibe? ¿Kan mu kuaasamø uvas tusrmera ellguawa, uvas misren, truigwanguen mamíibe? ¿Kan mu kuaasamø kabramerane ashib tøgagøbendø, pitsøn sunna muchimíibe? ⁸Kabe na øyeeg chib pasrappe, ¿møguelø isuimay trendaig tamagueh? ¿Tru maig maramigwan martrai Moisés

pørikkucha treetøwein chibig kòmuitarru? ⁹Kaguende tru maig maramigwan martrai Moisés pøriguma øyeeg chibig pørig pasran: Kan wey tirigun kwattraí itøbunab megabigwane mabashig kømub pusalgutsamig kømøn cha. ¿Kabe Tiusbe weymeran isua trendaig kø chindah? ¹⁰Øyeeg chippe, ¿namuimburab trendaig kømønrrab kø chindah? Pøs namuyasigwei pørig kuig køn. Kaguende pírowan arab megabiibe mamuitamab isuawei kwallib megaben, katø mugøben tirigun kwattraí itøbunab megabiibe tru misrigwan manrrab isuawei marøb megan. ¹¹Inchawei nama ñimuínug Tiusweimburabelan ellmarig købene, trube, ¿ñim chigøben tøgagúigwan maitøguen nam utamig menrra indig kønrrab kø chinderah? ¹²Tru kaneløma nømui chi palabigwan ñimun utambuawei utig købene, ¿nambe treetøguen kømø, utamigwein kòmuitarru? Inchen køben, nambe tru treeg utamigwane managuen treebe marmuig køn, Cristoi tabig srø wamwan chigøben iløsrkøbelø pønsmønrab, chigúindøgucha ka puraambub melaig køn. ¹³¿Ashmeelø kőtirru, Tiuswei yau marøb melabeløma truyuigwan maben, katø Tiuswei altaryu marøb pønrrabeløbe truyuigwan mabelø kui? ¹⁴Inchawei Señorbe treetøwei karua pasrig køn, Tiuswei tabig srø wamwan eshka kusrenanøbeløbe trutøga øsig warønrrain cha.

¹⁵Inchendø øyeeg maramdeelø kuindøgucha, nabe managuen trunune marmuig køn. Katø iigwan na pørbgucha, nan treeg martraímab isua pørmur. Pøs na chi treeg marmøwagurri na øyeeg purø tab kui mørøb møg inchib waminchib pasraigwan nan mugøben kerramøwatø, kwamikken søl kønrrautan. ¹⁶Pøs Tiuswei tru tabig srø wamwan na eshka kusrenanøb pasraibe nainetø møg inchib waminchib pasramig kømøtø køn. Kaguende nane truigwane martraím pasrig kur. ¡Pøs Tiuswei tabig srø wamwan na eshka waminchimuínaisruandøbe, nane maig kuaasamø! ¹⁷Inchawei maramigwan na naashib martrab isua marabe, truburø utamigwane utamønrrun. Inchen treeg kømøtø, ke nan trunun martrai inchendø marinaisruandøbe, trube, tru karua pasrigwan ka marmøn chimønrraindø marig kørømmisrtrun. ¹⁸¿Pøs trube, tru na marøb pasraímurø utiibe chi kønrrab kø? Na Tiuswei tabig srø wamwan eshka kusrenanøppe, truburø chi tranrrain kømø, na ka yandø waminchib pasraig, truig køn, tru Tiuswei tabig srø wamwan waminchib uña, na miambuawei miamigwan treeg utab pasrømø kagøbasig.

¹⁹Nabe mu karuig megamíig kuagucha, nabe natøwei mayeelø karuindiig meganrrab pasramisrar, maya nebuíngatig Cristoyasig misag nørø nebua tøgagønrrab. ²⁰Nabe judíosmerai utu uñippe, kan judío lataitøwei uñibig kur, nøm Criston nebua ashchai martrab. Tru maig maramigwan martrai Moisés pørig maig chibig truig ke nø karuig natøweínguen ke treeg pasrømuínaindøgucha, tru pørig maig chibig køben treeg melabelai utube, trube, tru pøriílan marøb megabig lataig uñibig kur, tru pørig maig chiben treeg melabelan Criston nebua ashchai martrab. ²¹Inchen Moisés pørigwan tøgagømeelai utube, treetøwei nagucha chigaig lataitøwei uñibig

kur, tru maig maramigwan pørig chigaig melabelan Criston nebua ashchai martrab. (Tius maig maramigwan martrai pørigwan na chi asamig chigaig kønrrab kømøtø, Cristo maig martrai karuigwan trunun nabe marøb megabig kur.) ²²Kullaateeløbabe nagucha kullaatiig lataitøwein pasrabig kur, tru kullaateelan Cristoin kønrrai martrab. Mu misaamerabatøgucha, nøm mailø køben, treeg kønrrab inchibig kur, møilandøguen chinchagøben kaigyugurri wesranrrab. ²³Iigwan na kerrigu øyeeg marøppe, Tiuswei tabig srø wamgurri øyeeg marøbig kur, truyugurri purø tabig tøgag arrubigwan nagucha trunun tøgatø utønrrab.

²⁴¿Ashmeelø kőtirru misaamera nørø tulaamba ashib purrainug møig kanab luldashchab luløbeløma luløppe, søteeløbawei lulendø, tru kanaigwan utabiibe kandø købig kui? Inchawei ñim luløppe, tru kanawa utamigwan Tius tranig utønrrurmab isua lulay. ²⁵Inchawei møikkøben treeg lulameløyu kebya pasramisrøbiibe, chiyutøgucha nui asr maig marøg køtanmaptø marøb megamøn. Pøs truiløbe kan corona ka petø minchib pinønrrabigwan utønrraptø treeg maren, trune nambe corona managuen minchib pinønrrabig kømfigwan utønrrab Tiusweiwan marøb meler. ²⁶Inchawei nabe luløppe, chu pumgúinguen mormubendø, luløbig lataig luløb megamøwei, katø kan kwayabig nørøtø, nørøtø kurrøb kwayab lataig pasrømøwei inchar. ²⁷Treeg kømøtø, nabe naasiitøwei nai asrwane purø murigu purayam kusrenrai kusrenanøb ke treegwan kønrrai inchibig kur. Inchippa na katøganelan eshka kusrenanøb pera pasrøwa, natøweinguen kaiman tainab megamønrrappe.

Taska mari tiusmeran Tius kui lataig mara tøgagømumig

10 ¹Nabe, ñim nai nunelan, tru merrabsrø namui kølli misag, judíosmera, mayeeløba wañi umbu melab, katø mayeeløba mar Rojoyu larraambub indigwan pesannamø, isua kønrrai inchar. ²Incha nømbe mayeeløba tru wañimba, marba pinøgasrøb pinøbuliilø kuikkurri Moisésba kanbalatø pønrran. ³Incha katø treetøwei mayeeløba Tiusweimburab mamigwandøwei mab, ⁴katø mayeeløba Tiusweimburab piwandøwei muchib indig købig køn. Kaguende tru nu srug nømun lincha ibig Tius tranigugurri webarrub piwan nømbe mutsig køn. Inchen tru nu sruube Cristo kuig køn. ⁵Inchen treeg amrruig kuindøgucha, misagwane kerrigu lutauwan Tiusbe chi tab kui ashmuig købig køn. Incha nømui asrmerabe mu misag warab waraimønug truørø kwaig waramig nebuig køn. ⁶Øyeeg pureppe, nam trunundøguen asha kusremig kønrrain kuig køn, nam ke chinchimmørø inchib chigøben kailan isub pønrramig kømønrrai, israelitasmera ke chinchimmørø inchib isub pønrrab lataitøwei. ⁷Pøs nøm møiløgøben chiwangøben kan tius kui lataig inchibelø lataitøwei marmøtay ñimbe. Pøs tru uras nøm øyeeg marigwan treeg chibig pørig pasran: “Tru misaamerabe manrrab, mutchab purramisra, trugurrimbe

pailamburab pailanrrab kurrig kòn” cha. ⁸Katø nambe menda møgueløba, menda ishumburmeraba namui asrtøga trømbøig marøbelø kømumig kòn, tru møiløgøben truilø treeg marøb latawei. Incha treekkurri kan kwalømyutø misaamera 23.000 kwaig købig kòn. ⁹Katø Señorwangucha ke chinchibig køtamørtrab kaig inchimumig kòn, tru møiløgøben truilø ke chinchibig køtashchab inchibelø latawei. Pøs truiløma ulmera tsatsiilø kwamig nebuig købig kòn. ¹⁰Nilø waminchib ñimuinetø namig, Tiuswan mulla mørmøtay, tru møiløgøben truilø treeg marøbelø lataitøwei. Truilanma tru kweechib ángel arrua, nømune pinisaig kòn.

¹¹Israelitasmeran øyeeg pureppe, nam trunundøguen asha kusremig kønrrain kuig kòn. Incha nam kusremig kønrrai pøriilø pønrran, nam yandø tru srabe kwalømmerra pui warab misaamerayasig. ¹²Inchawei mõikkøben Tiusweinug yandø ke tab pasarmab isua pasrabiibe, trube, peñchab kømø, purø tab isua pasrau. ¹³Ñim kebenøsrkønrrai indinab chigøben puinab pønrraibe, ke mun treeg nebuí asiimíig kømøtø, mundøgucha treeg nebuí asig kòn. Inchendø Tiusbe managucha nø maig tabig køppe, trendø treeg kua ¡katø! ke ñim kaima melønrraingatikkucha treeg pønrrøbashmønrrun. Ke chinchibelø køtashchab puim pønrrøbene, truguetøtø treegugurri wegørramigwan tøgatø tranøbig kòn, ñim kørøromø, ka puraambamig kønrrai.

¹⁴Inchawei treeg købene, nai undaarailø, tru taska mari tiusmeraimburabigwane kerriguwan tarømisray. ¹⁵Nabe ñimun waminchippe, yandø tab chigúí mørøbelan lataig waminchar. Na wamindigwane søl køtashchab isub purray. ¹⁶Tru copa mayanguen tabig, tru nam, ‘mayanguen pay’ tain copabe, ¿tru Cristoi ani namgucha kanguelarrøtø lata nøba pønrraig truig kømuitarru? Katø nam pirriwan pirisha maibe nam kanguelarrøtø Cristoi asru kanbalatø pønrraig ¿truig kømuitarru? ¹⁷Kaguende pirrima kandø kuig køppe, namgucha truba nu købendø, nambe kan asrtø ker, pøs mayeeløba kan pirriwandø mabeløgurri.

¹⁸Tru israelitasmeranma ñimguen isua asay: Tru kweecha tranig animalmerai yauwan mabelø, treeg marøppe, ka yauwandø mamøtø, ¿altarweimburabigwangucha tøga marøb pønrrømuitarru? ¹⁹Iigwan na øyeeg chippe, tru taska mari tiuswan trani yaumbe chi kòn chib, kabe tru taska mari tiusbe chi marøbig kòn chib pasømur. ²⁰Pøs nabe treeg kømøtø, Tiuswan ashmø misaamera judíos kømeeleø tru animal kweecha traniibe Tiuswan kømøtø, kwaimandziimeran tranig kòn cha trenchar. Incha nabe ñimune kwaimandziimeraba kanbalatø marøb pønrrømønrrai inchar. ²¹Ñimbe Señorwei copayuigwan mutsamba, kwaimandziimerai copayuigwan mutsamba inchimumig kòn. Katø Señorwei mishatsigúigwan mamba, kwaimandziimerai mishatsigúigwan mamba inchimumig kòn.

²²¿Kabe nambe peg tiuswan keesha pønrramisrøb Señorwane ke larrø namishinrrab inchab kø? ¿Kabe nambe nø lataguen kømø, purab martrapteelø købra chindah?

Chiwandøgucha marøppe, Tiuswan tabig wamindig kørnrai maramig kørn

²³Pøs: “Chiwandøgucha meriimíig, ka maramdiig”, købendø, chiwandøgucha lutøgurri maramibe chi tabig kømøn. Pøs: “Chiwandøgucha meriimíig, ka maramdiig”, købendø, lutøgurri truiløbe Tiusweimburab nørøramigube chi purugunrrabgailø kørn. ²⁴Mutøgucha ñuimburabigwandø tab kørnrai lamøtø, katøganelaimburab tab kørnrai lamig kørn.

²⁵Yau yanøbyu maig yau yanbashtø ka pena may, ñimui isub kebachib pasrabikkurri chi paya mørøb pørrømøtø. ²⁶Kaguende: “Pirøba, truyu chi pønrrabeløbañau kerriguba Señorweindø kørn.”

²⁷Inchen møikkøben Tiuswan køremíig nui yamay manrrab ñimun amrrunrrigay chiben, ñim ambabe, ñimun chi manrrai pønrsøbendø, mamig kørn, ñimui isub kebachib pasrabikkurri chi payib purrømøtø. ²⁸Inchen ñimun møikkøben: “I yaumbe tru taska mari tiusmerai kweetsi yaun kørn” cha, trenchibene, trube, mamumig kørn, tru treeg yaun kørn cha eshkabigwan mindisha kørørmarmønrrappa, katø trugurri isub kebachib pasrabigu kalø kørn chibig tøgagømønrraimba. ²⁹Inchendø nabe tru isub kebachib pasrabig ñuinug pasrabigwan waminchib pasrømøtø, nabe tru katøganuinuguigwan waminchib pasrar. Na chi iløsrkaimíig pasraigwan katøgan møweinug isub kebachib pasrabig nan kalø marøptiig kui mara, chiburø treeg marinab pasramibe chigagøn. ³⁰Mamigwan na Tiuswan ‘mayanguen ungwa, ungwa’ cha maben, trube, ñnane chindimbarre ‘kalø marøptiig kørn’ tah, tru na ungwa taig mamigwan maikkurri? ³¹Inchawei mabyu lata, muchibyu lata, kabe chi peg marøbyu lata, chi marigutøgucha Tiuswan maya nuguen tab indig kørnrai maramig kørn ñimbe. ³²Pøs mu misaamerandøgucha, judíosmeran lata, griegosmeran lata, Tiuswei iglesian lata ka srurrengwanrrai marmøtay, ³³na mundøgucha chiyutøgucha lata tab kørnrai inchib megab lataitøweingue. Nabe naimburaptø tab kørnrai lamøtø, misamera truba nørørowan tab kørnrai inchibig kur, nøm kaigyugurri wesrailø kørnrai.

11 ¹Na maig marøbig køben, ñimbe trunun asha marøb melønrrigay, Cristo maig marøbig køben, na trunun asha marøb megab lataitøweingue.

Tiuswei yau maig kømigwan waminchibig

²Nabe ‘ñimune tabig marin kørn’ chib mayanguen tabig waminchar, kaguende ñimbe chiyutøgucha nane isua melab, na ñimun maig waminchib kusrenniilane ñimbe elachimø, tøga pønrraimba. ³Inchendø nabe iigwan nebua asha kørnrai inchar, Cristobe maya møguelaim pala nø ashib pasrabig, nø tur køben, katø møøbe ishuan nø ashibig, nø tur køben, Tiusbe Criston nø ashib pasrabig, nø tur kui. ⁴Mu møøtøgucha turwan nebetsa Tiusba waminchib, kabe Tius maig karuigwan eshka waminchib, treeg pasrabiibe, Cristo, tru turwane chigucha kømíig kuig lataig marøb pasran. ⁵Inchen mu ishutøgucha chi nebetsømø,

turtiig Tiusba waminchib, kabe Tius maig karuigwan eshkaab waminchib, treeg pasrabiibe, møømisag, tru turwane chigucha kòmíig kuig lataig marøb pasran. Kaguende pusrugwan mulla, parig lataitøwein kòn. ⁶Inchen ishug nebetsømíibe, trube, pusrugwan mulla, paramig kòn. Inchen ishuwan pusrugwan mulla, pariibe kørig kønrraptiig købene, trube, turwan nebetsaig kømíig kòn. ⁷Inchen møøbe turwan kasrøb nebetsamig kømøn. Kaguende møøbe Tius nø maig køben treetøwein køb, katø Tiuswei tru purø nuig tørguegurnabigwan nuinug kenamarøbig kòn. Inchen ishuumisaabe møwei tru tørguegurnabigwan kenamarøbig, treeg kòn. ⁸Kaguende møøbe ishuumisagweinukkurri arrubig kømøtø, ishukken møweinukkurri arrubig kòn. ⁹Inchagucha tru srøsrø Tius mowan marøppe, ishuumisagweyasig marmøtø, ishuwanguen møømisagweyasig marig kòn. ¹⁰Inchawei treekkurri ishuube møg maig chiben treeg megabig kui ashchai, ángelesmeragurri nui turwane nebetsaig kømíig kòn.

¹¹Inchendø Señorweinuube møømisag ka nuimburaptø kønrrab kømøwei, ishuumisag ka nuimburaptø kønrrab kømøwein kòn. ¹²Inchawei ishuuma møweinukkurri arrub lataitøwei, møkkucha ishuumisagweinukkurri kal-labig kòn. Inchendø kerriguba arruppe, Tiusweinukkurri arrubig kòn. ¹³Inchawei ñimdøwei maig kõtashchab isuy: ¿Ishug misaabe turwan chi nebetsømíig Tiusba waminchib pasramig søl kòbsru chinderah? ¹⁴¿Inchen kan mowane pusrugwan yabig wanørkøb tøgagømibe trømbøtiig kørikken kønrraptiig købig kui, tru trendø treeg kønrrai chine mara pønrsailøtøweinguen kusrennøbig kømuitarru? ¹⁵Trune ishuwane pusrugwan yabig wanørkamibe nuimbe truba tabig kòn, kaguende ishuwane turyu nebetsig lataitøwei pusrugwan tranig kua. ¹⁶Inchen møikkøben ‘øyeelan treeg kømøn’ chib, chinetø chib waminchig kui indindøgucha, nambe øyeelanwei maren, katø Tiuswei iglesiamera chigucha treetøwei marøbelø kòn.

Señorwei mamigwan mabyu maramgailan marøb

¹⁷Na øyamay maramig kòn chib yu wamindamigube, ‘¡kan waachaalleelø! yangucha tabig marøb melain kòn’ chinrrab inchimur. Ñim tulundzunappe, ka trømbøig martrab tulundzunabelø kuin kòn, chi tabig martrab kømøtø. ¹⁸Na pølbasa wamindamibe øyeemerrig kørre, ñim kan iglesiasun tulundzunøbendø, ka nøøø nøøø misra warønrraptørre tulundzunabelø kuigwan, pøs møyube nabe treegwein købwei inditamar. ¹⁹Pøs øyeeg nømuin kui nøøø misrøb ñim treeg inchib waramig palabwei indan, ñimui utu møilø sølwan isua marøbelø kuitashchab truyu asamig kønrrai. ²⁰Pøs ñim kanbalatø linchib tulundzunappe, Señorwei mamigwan manrrab tulundzunømøtø, ²¹møitøgucha ñimui mamigwanmerrig manrrab tulundzunabelø kòn, katøganelan munugumøtø, kane parøgwaig wamnebe, kane mutsiguikken wanrrab. ²²¿Kabe ñimbe yamera chigargøtirru mab, muchib purramig? ¿Kabe Tiuswei iglesiane kaashib, chigar purrabelane kørig purørtrab inchigueh? ¿Nabe ñimune mandø chinrrab køh? ¿Kabe, ¡waachaalleelø, yangucha tabig marin kòn! chinrrab kø chindah? ¡Øyeeg marigwane kan waachaalleelø truba tabig marin kòn! chinrrab pasrømur.

**Señorwei pirriwanba, copayu mutsigwanba mandø
maramigwan Pablo tab eshkab**

(Mt 26.26-29; Mc 14.22-25; Lc 22.14-20)

²³Kaguende tru na ñimun katøle kusrenanigwane nabe Señorwan utig kuig køn: Señor Jesúswan tru ashig kømui inchi belan tranrrab yem, nõbe pirriwan muta, ²⁴yandø ‘mayanguen pay’ cha, pirishabe, trendaig køn: “Iibe nai asr køn cha, tru ñimuyasig kwanrrai tranig. Iigwan øyeeq marøppe, nan isub kønrrab martrigay” cha. ²⁵Incha tru mamigwan chab mabe, katø copangucha mutabe, trendaig køn: “I copabe tru nai anindøga Tius tru srø acuerdo mara pasrig, truig køn cha. Iigwan mutsimørig, chu uraskucha nan isub kønrrab martrigay” cha. ²⁶Inchawei chu uraskucha i pirriwan mab, i copayuigwan muchib indimørig, Señorbe namuimburo kwaig købig køn cha ñimbe eshkab pønrran nõ arrumnegatig.

Señorwei mamigwan sølwan maramig

²⁷Inchawei mõikkøben maig købash inchendø, Señorwei pirriwanba, copayuigwanba mab, muchib inchi biibe, Señorwei asrwanba, aniwanba nuinug trømbøig marøb pasran. ²⁸Inchawei mõitøgucha ñimashib maig pønrrabraitashchab isummerrig isuy. Trugurrimbe pirriwan mab, copayuigwan muchib indamig køn. ²⁹Kaguende mõikkøben Señorwei asrwane ni kan maig kerahmabguen isua ashmøtø, tru mab, muchib indiibe nuyasiitøwei lab pasran trømbøig nebui pasramig kønrrai. ³⁰Inchawei øyeeqkurri ñimui utube kwanreelø, kullaarailø truba nõrrø køben, mõiløbe kwaig, mu kaagøn. ³¹Inchendø nam namashib mõitøgucha nam mandø pønrramigwan treeg pønrrabraitashchab tab isubene, trube, Tius namun maig maramigwan asha mara, kørrø mariilø kømubsruinrrun. ³²Inchendø Señor namun maig maramigwan asha mariilø pønrrappe, nam kalø marigwan nõ namun ølmartrab mariilø pønrrer, pirau nun ashmeeløba tøgatø namun kaigyu pønrrailø kømønrrab.

³³Inchawei, nai nunelø, ñim tru mamigwan manrrab tulundzunabe, kangurrin kangurri muniiramig køn. ³⁴Ñimun mõigwan køben parøgwabene, trube, ñimui yausrø mamig køn, tru ñim tulundzuna waraibe Tius ñimun møra pønrrønrrai marinab waramig kømønrraimbe. Inchen nõørø katøgan maramelane, na trusrø pua, maig kønrrabigwan tamara pønrramønrrun.

**Espíritu Santo mõigwandøgucha Tiusweyasig
peg peg marøbelø kønrrai pirisha ketig**

12 ¹Nai nunelø, Tiusweimburabeløyu iglesiayasig marøbelø kønrrai Espíritu Santo keta tranigweimburappe, chigúinguen mõrmeelø kørrø misrønrrai inchar.

²Ñimbe isua kuinrrun, ñim judíos kømeelø Tiuswan ashmeelø køb urasbe, mumay køben srua amrramabelø købig kuigwan tru chi wamgailø taska

mari tiusmeraimay. ³Inchawei nabe ñimun eshkanrrab inchar, Tiuswei Espíritu trendingaruben waminchibiibe, mugucha øyeeg chinraamøn cha: “Jesúswane kaig nebubash” chib. Katø Espíritu Santo trendingarumubene, mugucha øyeeg chinraamøn cha: “Jesúsbe tru Señor køn” cha.

⁴Pøs Tiusweimburabigu marøbig kønrrai keta traniiløbe peg, peg købendø, tru traniiløbe Espíritu Santo inukkurrindøwei arrubig køn. ⁵Katø chi purugub marameløgucha, peemay, peemay maramig kuindøgucha, Señorbe kandø køn. ⁶Katø chi marameløgucha peemay, peemay maramig købendø, tru marameløyu chiwandøgucha trumørig mayeelainug marøb pasrabiibe, tru Tiustøwein køn.

⁷Inchendø Espíritu Santo nø møigweinuutøgucha øyamay marøb kena pasrabig køn, mayeelan kelarrappa tab kønrrai. ⁸Kaguende møigwane Espíritu Santo nøgurri nui wamindiiløyu maig kømigwan purø may isua waminchibig kønrrain tranøppe, katøganune maig kuigwan tab chigúí møra waminchibig kønrrai tranan tru Espíritu Santotøwei. ⁹Inchen tru Espíritu Santotøwei katøganune nui isubigwan Jesucristoinug tøgagømburab tøgagønrrai tranen, katøganune kwanreelan tamarøbig kømigwan tru Espíritu Santotøwei tranan. ¹⁰Katøganune Tius maramburab mariilan marøbig kømigwan tranen, katøganune Tius maig karuigwan eshkabig kønrrai trunun tranen, katøganune Tiuswei Espíritu kuin kui, kabe treeg kømuin kui tørgandø nebua ashibig kømigwan, trunun tranan. Inchen katøganune peg, peg wammera waminchibig kønrrain tranen, katøganune tru peg wammera wamindiilan: “Øyeeg tan” cha eshkabig kønrrai, treeg tranan. ¹¹Inchen ilan kerrigu øyeeg marøb pasrabiibe, nøtø kandø, tru Espíritu Santotøwein køn, møigwandøgucha nun maig tranamdiig køben, treeg tranøbig.

Asrbe kandø købendø, truyube chine pønrran

¹²Asрма kandø købendø, tru asrube chine tøgag køn. Inchen tru asru pønrrabeløbe truba nu købendø, kan asrtø køn. Inchawei Cristogucha treetøwein køn. ¹³Kaguende nambe mayeeløba kan asrtø misrtrab kan Espíritutøgatø pinøbuliilø kuig køn, judíosmera lata, griegosmera lata, karuindiig melabelø lata, treeg melømeelø lata. Incha namune mayeelanba tru Espíritu Santondøwei utønrrai tranig køn.

¹⁴Inchawei asrbe kanbaløtiig kønrrab kømøtø, chine, chine pønšraig tøgag køn. ¹⁵Inchawei srøbma øyeeg taimbeh: “Tasig kømuikkurri asruig kømur” cha. ¿Treekkurri, trube, asruig kømøtø, nøøriig kønrrautah? ¹⁶Inchen kalugucha øyeeg taimbeh: “Nabe kab kømuikkurri asruig kømur” cha. ¿Treekkurri, trube, asruig kømøtø, nøøriig kønrrautah? ¹⁷Inchen asr ørøba kaptø kuimbe ¿trube, mandø incha mørøbsrueh? Inchen kerriguba kalutø kuimbe ¿trube, mandø incha irrømrøbsrueh? ¹⁸Pøs Tiusbe asru chiwandøgucha nøm chu pønrrønrrabelan truyu, truyu pønrrønrrai

põnsraig køn, nun maig asõnaben, treekke. ¹⁹Kaguende asru chi pønrrabig kerriguba kanbalõtiig kuimbe ¿trube, asrbe chu pasrabsruerah? ²⁰Inchawei nuin kui, nuin kui truba yambalø købendø, asrbe kandø køn.

²¹Pøs kappe tasigwane øyeeg chinrraamøn: “Ñune chi palømøtan” cha. Katø tur chigucha srøbmeran øyeeg chinrraamøn: “Ñimune chi palømøtan” cha. ²²Inchawei treeg kømøtø, asru murguen kebatamgailøbe masken palabig køn. ²³Inchen asru tre tabig kømø lataigwane nambe katøguchinguen tab tøgagøbelø ker. Inchen asru tre tabig kømíg asõnabelane nambe masken tabig kasra tøgaguer. ²⁴Pøs namui asru chi kørig isumgaig tøgagúiløbe tre isua asamig palain kømøn. Inchendø Tiusbe namui asrwan øyamay pønrrøb tamaran, tru trengatig tab inchib tøgagúimeelane mas tab inchab. ²⁵Øyamay møibe nøørø, nøørø kønrrain kømøtø, masken asru pønrrabeløbe møitøgucha ambugurri, igurri lata isunrrain køn. ²⁶Asru pønrrabelø møikkøben pusrkwai inchene, truyu pønrrabeløgucha kerriguba truibā pusrkwai mōran. Katø asru møigwan køben tab inchene, truyu pønrrabeløbe mayamba truibā tab kui mōrøb kasraaran.

²⁷Pøs inchawei ñimbe Cristoi asr kua, ñimbe møitøgucha kan kan nui asruelø køn. ²⁸Incha Tiusbe nui iglesiayu Cristo nõashib karua øriilan nõmunmerrig wesrawa, pønnsraig køn. Incha tru wendaube Tius maig karuigwan eshkabelan wesrawa, pønnsra, yandø tru wendaube kusrennrrabelan wesrawa, pønnsrøbig køn. Incha trugurrimbe maramburab mariilø treeg marøbelan, trugurrimbe kwanrreelan tamarøbelø kønrrai keta traniilan, trugurrimbe tru purugubelan, trugurrimbe chi maramigwan asha marøb pønrrabelan, katø møilane peg, peg wammera waminchibelø kønrrai keta traniilan, treeg pønnsraig køn. ²⁹¿Kabe mayeeløba Cristo nõashib karua øriiløtø kuitarru? ¿Kabe mayeeløba Tius maig karuigwan eshkabeløtø kuitarru? ¿Kabe mutøgucha kusrennøbeløtø kuitarru? ¿Kabe mayamba maramburab mariilan marøbeløtø kuitarru? ³⁰¿Katø mayeeløba kwanrreelan tamarøbelø kømigwan keta tranig utartø kuitarru? ¿Kabe mayamba peg wammera waminchibeløtø kuitarru? ¿Kabe mayamba peg peg wammera wamindiilan ‘øyeeg tan’ cha, eshkabeløtø kuitarru? ³¹Inchendø ñimbe tru keta traniilan mas tabigwan nebua ke tøgagønrrab isua lab melamig køn.

Chiwandøgucha purab nuibe tru undag købig køn

Inchen nabe treetøguen kømø, kan may mas tabigwan eshkanrrab inchar, truwan ambamig.

13 ¹Chi wammera køben mōguelø wamindi wamwan na waminchib, katø ángesmera wamindi wamwanguen na wamindindøgucha, tru na undag købigwan chigaig kuinaisruandøbe, nabe kan tsandzøn wanrrøbig lataig, kabe kan tsandzøn platilloswan ichen ka wanrrøbig lataitø kømønrrun. ²Tius maig karuben na trunun eshkan pasramig keta tranig tøgag køb, katø mu nebua asiimíg sorig pønrrabigwan kerriguba chigúí mōrøb, katø nebua asamburab

kerriguwan nebua ashibig kòb, katò nai isubigwan kerriguba Jesucristoinuutò na tøgagømburab tøgagúikkurri nòrrò tunmeranguen nòròrsò puraamba pònrròrrai maròbig, na treeg tøgagøb indaindøgucha, undag kòbigwan chigaig kuinaisruandøbe, nabe chigucha kòmur. ³Na chi tøgagúilan kerrigu ketøb, katò nai asrwanguen parrig kònrrai na tranøb indindøgucha, undag kòbigwan na tøgagømuinaiaruandøbe, treeg maratøbe nabe chigú wesramø.

⁴Undag kòbiibe chi puindøgucha tammay ka megabig kòmig, larrø tab inchibig kòmig, treeg kòn. Undag kòbiibe katøgan chigøben tøgagøben pusrkwai ashib pasrømíig kòmig, katø purø møg inchib chib waminchimíig kòmig, katø undag kòbiibe purab nuig misrøb pasrømíig kòmig, treeg kòn. ⁵Undag kòbiibe larrø tsag inchib maig kòbash inchimíig kòmig, nuimburaþtø tab kònrrai inchimíig kòmig, ke kuchingurrindø namømíig kòmig, kalø marig chab purayeean katøle isub namig kòrrømisrømíig kòmig, treeg kòn. ⁶Undag kòbiibe chigøben sølgandø tabig mariimeeløyu tab kui mørøb kasrag pasramig kòmøtø, isa kømíig, søligube tab kui mørøb kasrag pasramig, treeg kòn. ⁷Undag kòbiibe ‘øyangatiitø kòtan’ chimø, awentabig kòmig, kerrigu kòrewa pasrabig kòmig, katø chiwandøgucha ka muniirabig kòmig, chine nebub arruben, treegu ka pureb megabig kòmig, treeg kòn.

⁸Undag kòbiibe managuen patsønrraamøn. Trune Tius tru maig karuigwan eshkameløbe patsab, katø peg, peg wammera wamindiiløbe yandø patsab, trugurri tru kusremburab kusrewa nebua asiiløgucha patsab inchun. ⁹Kaguende nambe newan kømø, mayandøwei nebua asha køben, katø Tius maig karuben nam eshkailøgucha newan kømø, mayandøwei nebua eshkailø kòn. ¹⁰Inchen Señorwein kwaløm tru newanig tabig pubene, tru newanig kømíig mayandøwein kòbiibe yandø pinønrrun.

¹¹Na unø kòb urasbe unø wamindimay waminchib, unø isuimay isub, øyamay kuitamab unø isuimay isub inchibig kòbig kur. Inchen yandø kølig misrabe, unø kua maig kòbig kuigwane elachar. ¹²Møimbe nambe kan espejo tre tør kenamíigu ashib lataitø aser. Inchendø tru urasbe nambe malaugue asamig kònrrun. Møi yambe nabe mayangatiitø nebua ashibig kuinaindøgucha, tru urasbe kerrigu newan nebua asamønrrun, na maig kuigwan Tius nan asig kòb lataitøwei.

¹³Inchen møi yambe pøngatø pønrrabig pønrran: isubigwan Jesucristoinuutø pasriiba, katø isua munig melaiba, trugurri tru undag kòbiiba. Inchendø tru i pøngatøyu purab nuibe tru undag kòbig kòn.

**Peg wammera waminchibig kònrrai traniiløba,
Tius maig karuigwan eshkailøba**

14 ¹Nimbe undag kòbigwan tøgø pønrrabig pønrrab, katø Tiusweimburabeløyu marøbelø kòmig nò keta traniilan tøgagømigwan isub inday. Inchendø Tius tru maig karuigwan eshkabelø kòmigwan, trunun tøgagønrrab indamig kòn. ²Kaguende peg wam

møriimíig waminchibiibe móguelan kòmøtø, Tiusba waminchen, mugucha ni chi tainguen mormøn, pøs Espíritu Santogurri chinchaguen wetøgørramgailø waminchen. ³Trune Tius tru maig karuigwan eshkabiibe misagwan wamindan, Tiusweimburab mas nørørab ambamigweyasiiba, maig melamigwan treeg marøb melønrrai wamindamigweyasiiba, chigúindøgucha ka puraambub melønrrai purugumigweyasiiba.

⁴Møikkøben kan peg wam møriimíig waminchibiibe Tiusweimburabigu nøasiitøwei nuraben, trune Tius maig karuigwan eshkabiibe iglesian Tiusweimburabigu nørøranrrai wamindan. ⁵Pøs nane ñim mayeeløba peg wammera waminchibelo kuimbemab isutan. Inchendø Tius maig karuigwan ñim trunun eshkabelø kuimbe køtan. Kaguende treegwan waminchibiibe mas nuikken køn. Inchendø peg wam wamindikkucha tabitøwein køn, tru peg wam wamindigwan møikkøben ‘øyeeg tan’ cha eshkabene, iglesiabe Tiusweimburabigu nørøranrrai. ⁶Pøs inchawei, nai nunelø, na ñimuisrømay arrua, peg wam wamindimbe ¿ñimune chigúí purugunrrab kø? Tius maig kenamarigwan eshkamøwei, chigúí mørøb nebua asilan waminchimøwei, kabe Tius maig karuigwan eshkamøwei, kabe chi kusrenmøwei inchene.

⁷Kan chimera køben øsiguig komeelanguen, luswan lata, arpan lata chiwan urramigwan chi wanri mörtrain kønømbene ¿trube, tru lus urrigwan chi urri mörangawei, arpa kønigwan chiwan køni mörangawei kømønrraitarru? ⁸Inchawei katø kan trompetanma tru chi maramigwan chigúí mörtraí truigwan urrømbene ¿kwayanrrab webamrrab mu kuin tamartrab kø? ⁹Inchawei ñimgucha treetøwein køn. Ñim tru peg wamwan wamindigu chi tai möramdiig treeg waminchimubene, ¿ñim waminchib pønrraigwane mandiincha chi tai möriasamø? Ñimui wamindiibe isig ichibigu wamindi lataitø purainrrun. ¹⁰Pøs yu pirauma chi wammera køben purø nørø køn. Inchendø chi wamdøgucha tru wamwan waminchibigweimbe chi taig möramdiig køn. ¹¹Inchawei nama møikkøben peg wam wamindigwan ni chi tainguen mörtrab kaima pasrappe, nabe tru waminchibigweimbe nuim pirauiig kòmøtø, peesriig lataig kømønrrun. Inchen nøgurringucha naimbe peg pirausriig lataig kønrrun. ¹²Inchawei ñim tru Tiusweimburabeløyu maramig nø keta tranigwan tøgagønrrab inchib melabeløbe, truilan masken, masken tøgagønrrab inday, iglesian Tiusweimburabigu nørøram purugumig.

¹³Inchawei møikkøben kan peg wam møriimíig waminchibiibe, trube, tru peg wam wamindigwan ‘øyan tan’ cha katøburø eshkabig kønrrab, Tiuswan trunun tranrra cha miamig køn. ¹⁴Kaguende na peg wamdøga Tiusba waminchib pasrøbene, nai espíritube Tiusba wamindingucha, nai turyu isubigube chigucha chi kørørmismønrrun. ¹⁵¿Trube, treeg købene, nabe mandø inchab køh? Nai espíritutøga na Tiusba waminchippe, nai turyu chigúí mørøb isuitøgagucha Tiusba wamindamønrrun. Katø nai espíritutøga cantappe, katø turyu chigúí mørøb isuitøgagucha Tiuswan cantamønrrun.

16Inchawei ñibe ñui espíritutogato ‘Tiuswan mayanguen tabig køn’ chib, ‘ungwa’ chib pasrøben, møikkøben Tiusweimburabigwan chi kusremíbe ñi trenchib pasraigwan chi tainguen mormuig køppe ‘treegwein køn’ chib, maana trenchinrrab kø. 17Pøs ñibe Tiuswan mayangucha tabig ungwa taingucha, treeg mariibe kanune Tiusweimburabigu nuramig chi purugumøn.

18Nabe Tiuswan ‘mayanguen ungwa, ungwa’ char; kaguende nabe peg wammera mas yamguen waminchibig kur, ñim mayeelø lataitøguen kømø. 19Inchendo iglesiyube trattrøgatøtiitøgucha chi taig mōramdiig treeg wamindinguen køtan, kaneløgucha chigúii mōrøb kusrenrrai, peg triimay diez milburab chi taig mōramgaig waminchib pasrabgunrriibe.

20Nai nunelø, ñim maig isumigube ureezheelø latailø kønrrab kømøtø, chigøben kaig maramigwan isua asamigube shushcheelø latailø kømig køn. Inchen maig isumigube yandø køleeløsun isubelø kømig køn. 21Pøs tru maig maramigwan martrai Moisés pøriguma trenchibig køn:

“Señorbe trendaig køn cha:

‘I misaameran mōguelø peg triimay wamindiiløtøga na wamindamba, peg pirausrø misaamera nøm wamindigu na wamindamba inchen, ni treekken nane mōrmønrrautan’ ” cha.

22Inchawei tru peg wammera mōriimíig wamindiiløbe Tiuswan kørebelayasig kømøtø, Tiuswan køremø misaamerain køn, Tius truyu pasrain kui asamig kønrrai. Trune tru Tius maig karuigwan eshkaibe Tiuswan køremø misaamerain kømøtø, Tiuswan kørebelayasig køn. 23Inchawei ñim iglesia mayamba tulundzuna, mayamba peg triimay mōriimíig waminchib køben, tru peg wammera waminchibig kønrrai Tius keta tranigweimburabigwan kusremeelø kui, kabe Tiuswan køremeelø kui mōin kebambatø pønrrabeløbe, ¿ñimune ‘chab lukiaian køn’ chimønrrab køh? 24Trune ñim mayeeløba Tius maig karuigwan trunun eshkabene, Tiuswan køremíig kui, kabe møikkøben Tiusweimburabigwan kusremíig kui kebya pasrabiibe, mayeelø wamindiitøga nøbe kaig marøbigwein købrairrenmab isunrrai marøb, mayeelø wamindiitøga nune kaig marøbig kuin kui asha kørrømarøb inchen. 25Inchen nui manrrau nuinetø chi isua tøgagúiløbe tørgandø kenamarig kønrrun. Inchen øyeekkurri nøbe pirau srala, Tiuswan køriibala tabig waminchib, trenchinrrun: “¡Isa kømøtø, Tiusbe ñimui utu pasrabwei indan!” cha.

Tiusweyasig marøb tulundzuninug maig maramigwan tabig marøb

26Trube, treeg købene, nai nunelø, ¿mandø chinrrab køh? Pøs ñim tulundzunappe, mōitøgucha kane cantamig tøga kuin kui, kabe mōibe kusrennamig tøga kuin kui, kabe mōibe Tius nun kenamarigwan wamindamig tøga kuin kui, mōibe peg wam mōriimíig wamindamig tøga kuin kui, kabe mōibe tru peg wam wamindigwan ‘i wamindiibe øyeeg chibig køn’ cha, eshkamig tøga kuin kui, ñimbe treeg purrabelø køn. Trube, truigwan marøppe, chiwandøgucha iglesiane Tiusweimburabigu mas nōrrørab ambamig kønrrai maramig køn.

²⁷Inchawei tru peg wamwan waminchippe, pailø kui, kabe pøneløgatig, treetø wamindamig køn. Treetøgucha kan kan waminchen, kane 'i wamindiibe øyeeg chibig køn' cha eshkamig køn. ²⁸Inchen tru peg wamwan wamindigwan 'i wamindiibe øyeeg tan' cha eshkanrrabig mu kaabene, trube, iglesiayube truigwane esegappa, nuinetø waminchib katø Tiusbatø wamindamig køn.

²⁹Inchen katø Tius maig karuigwan eshkabeløgucha pailø kui, pønelø kui treetø wamindamig køn. Inchen kaneløbe tru wamindigwan Tiuswein køh, kabe Tiuswein kømø chinderamab isub purramig køn. ³⁰Inchen møigwan køben truyu wabigwan inchippa, chigøben waminchai Tius eshkangaruben wamincheenchene, trube, tru waminchib pasrabiibe mas waminchimumig køn. ³¹Kaguende nīmbe mayeeløba Tius tru maig karuigwan eshkappe, kan kan wamindamig køn, mayeeløba kusreb, katø mayeeløba tab melamigwan utab inchai. ³²Inchagucha Tius maig karuigwan eshkabelai espíritumerabe nøm maig kønrrain køben, treegwan martrab pønrran. ³³Kaguende Tiusbe chi maringuen asiimíig marøb Tius kømøtø, ambugurri, igurri chi isumgaig lata tab kui møramig, treeg Tius køn.

Tru Tiuswei misaamera maya iglesiamera maig marøbelø køben, ³⁴treetøwei ishumburmerabe iglesiayube niløtø purramig køn. Kaguende truyube ishuumisagwane waminchimønrrai indiilø køn. Pøs tru maig maramigwan martrai Moisés pørigu chigucha trenchibig køn, nømbe maig chiben treeg melamig køn cha. ³⁵Nøm chiwan køben nebua kusremig paløbene, nømui kelan nømui yau payamig køn. Kaguende kan ishug iglesiayu waminchab indamibe chi søl kømøn. ³⁶¿Tiuswei wambe kabe nīmuinukkurri pølbasa arrig kø chindah? ¿Kabe ke nīmuinuutø puig kø chindah?

³⁷Pøs møikkøben 'Tius maig karuigwan eshkabig treeg kurmab' isub, kabe 'Tiusweimburabigwan maramig keta tranig tøgaaig kurmab' isub inchabe, trube, tru iig na nīmun pørigwane Señor nø karua pasrøbwei indig kui, treeg isua asamig køn. ³⁸Inchen øyeeg kui ashatøgucha, nø ashmíig misrene, nungucha treetøwei isua ashmuinab pasrønrrun.

³⁹Inchawei treeg købene, nai nunelø, Tius maig karuigwan eshkamigwan martrab inchib melay. Katø tru peg wammera mōriimíig wamindamigwangucha merømøtay. ⁴⁰Inchendø chiwandøgucha marøppe, tabig sølwan marammay maramig køn, ambumay, imay ke chi maringuen asamgaig martrab kømøtø.

Cristo kwawa, katøle øsiiraigwan waminchibig

15 ¹Møimbe, nai nunelø, na Tiuswei tabig srø wamwan eshka kusrenanig købigwan katøle nīmun isunanrrab inchar, nīm trunun uta, truigwan elachimø, truyu mur pønrraigwan. ²Nīmbe tru Tiuswei tabig srø wamgurriwei kaigyugurri wesrailø køn, na nīmun maig eshka kusrenanigwan trunun elachimø, tindøga pønrrøwabe. Trengømuisruandøbe, tru nīm køreibe chi køremui lataitøwein kuin kønrrun.

³Nabe ñimun kusrenanøppe, tru nan mas nuig purø tabig kusrenanig utig købigwan ñimun kusrenanig køn, Tiuswei wamwan pørigu maig chibig køben, namui kaig mariiløgurri Cristobe treeg kwawa, ⁴katø nøbe, Tiuswei wamwan pørigu maig chibig køben, treeg sørig kua, pøn kwalømyube katøle øsiirawa, ⁵Pedron kenamisrøb, katø trugurrimbe tru nøashib karua øriilø tru doceelan kenamisra, ⁶trugurrimbe albiji nunelø quinientos menrrawan kenamisrig købigwan. Tru ashibeløbe mayeelø lutau ka øsig amønan, kan kandøwei yandø kwaig mu kaaben. ⁷Incha trugurrimbe Santiagon kenamisra, trugurri mas wendøbe tru nøashib karua øriilan mayeeelanba kenamisrig køn.

⁸Incha yandø kerrigu srabebe katø nan kenamisrig købig køn, na tru kal-lam kwaløm kømø, kal-lawa lataigwan. ⁹Pøs nabe Cristo nøashib karua øriilai utube truburab kømfig, purø lamfig kur. Trurrigu Cristo nøashib karua ørig køn cha trenchaguen wamig kønrrabgaikke, kaguende nabe Tiuswei iglesian larrø kaig marøbig købig kur. ¹⁰Inchendø na mõi øyah pasrappe, Tius nan ka yandø tab indiitøgatø na treeg pasrainatan. Inchen nui tru ka yandø tab indiibe kagatø purayaig kømøtø køn. Treeg kømøtø, nabe masken tru Cristo karua øriilø mayeelø nøm lataguen kømø, marinabig køn. Inchendø na marig kømøtø, Tiuswei tru ka yandø tab indig naba pasraikkurri marig køn. ¹¹Pøs na wamindig kui lata, kabe nøm wamindig kui lata, nambe iigwan eshkab kusrenanen, ñimbe iigwan treeg køreig købig køn.

Kwabelø katøle øsiiramigwan waminchib

¹²Pøs trube, Cristobe tru kwailai utugurri katøle øsiirraig købigwan eshkab kusrenanig købendøbe, trube, ñim møiløgøben ñimui utu mandøgurriinre øyeeg chib køh, kwabeløbe katøle øsiirawa kurrømønrrun chibren kønrrappe? ¹³Pøs, tru kwabelø katøle øsiirawa kurrømuig købene, trube, Cristogucha katøle øsiirawa, kurrømuig køn. ¹⁴Trube, Cristo katøle øsiirawa, kurrømuig kuig købene, nam Tiuswei wamwan eshkab kusrenaniibe ka yandiig kørrømisren, katø treetøwei ñimui isubigwan Cristoinug pasra pønrraikkucha tøgagømuingueniitø purayan. ¹⁵Katøgucha treetø kømø, nambe Tiusweiwan ka isatø waminchib pønrrabelø kuig, treeg webinrrun. Kaguende nambe ‘Tiusbe Cristone katøle øsiirangaruig køn’ chib pønrrraig kuig køn. Inchen kwailø øsiiramønrrab kui cierton webibene, trube, Tiusbe katøle Criston øsiirangarumuig, treeg køn. ¹⁶Pøs kwailø katøle øsiiramuiig købene, Cristogucha, trube, øsiiramuiig køn. ¹⁷Inchen Cristo katøle øsiiramuiig købene, trube, ñimui isubigwan nuinug tøga pønrraikkucha, tøgagømuinguenig tøgagúig puraiiben, trube, ñimbe katøgucha kaig marøb srø amønan. ¹⁸Trube, treeg købene, Criston tru kørewa kwabeløgucha pinab pinamsrø pønrrønrrab amban. ¹⁹Nam yu øsig amønaigu ka pirauweyasiitø Criston isub muniirabelø kuisruandøbe, nambe maya misaamerai utu trembe misag kømuinguenelø ker.

²⁰Inchendø treeg kømøtø køn. Cristobeguende kwabelai utugurri katøle øsiirabwei indig køn, tru kwabelai utugurri ke srøsrøzhiitø ke nømerrig pølbasa øsiirab. ²¹Pøs kwamima kan møkkurrindø arrig købene, katø kwabelø katøle øsiirawa kurramikkuca kan møkkurrindø arrig køn. ²²Inchawei Adángurrima mayeeløba kwaben, katø treetøwei Cristogurri øsig kømigwanguca mayeeløba tøgagønrrun. ²³Inchendø mõitøgucha nøm mõimerrig pølbasa øsiinrrabig køben, treeg kønrrun: Cristo ke srøsrøzhiitø nømerrig pølbasa øsiiraben, trugurrimbe nø katøle arruben nuielø øsiiranrrabelø køn. ²⁴Trugurrimbe yandø tru srahe kwaløm punrrabig køn, Cristo tru nørreelø nøm asha karub purrabelan køben, mugucha manchinrraingai nøm karubelan køben, nørreelø maramburab marøb purrabelan køben, yandø truilan kerriguwan chigucha martrabgailø kørømara, tru Cristo ashib karub waigwan yandø Tius Møskawan nø ashchai purøoren. ²⁵Kaguende Cristobe nun tru ashig kømui inchibelø tsaleelan nui srøb umbu nø maig chiben treeg pønrrønrrai, Tius nun pønramnegatig, nøbe ashib karub wanrrabig køn. ²⁶Inchen tru ashig kømui inchib tsalø inchibig srabeig pasrabigwan pinisaig kønrrabiibe, tru kwamig køn. ²⁷Kaguende Tiuswei wamwan pørigube trenchibig køn: “Chigurrimbunø købigwan kerriguba nui srøb umbu nø maig chiben treeg pønrrønrrai Tius pønraig køn” cha. Pøs: “Chigurrimbunø købigwan”, nui srøb umbu pønraig køn chippe, Tiuswanguca truyu tøg pasrig køn cha trenchimuig kui tøgandø asamdiig køn. Kaguende Tius nøwein køn tru chiwandøgucha kerriguba Cristo maig chiben treeg pønrrønrrai marøbiibe. ²⁸Inchen Tius chiwandøgucha kerriguba Cristo maig chiben treeg pønrrønrrai, nun chab pønrsøbene, Cristo, tru Nusrkaindøweinguen, tru chigurrimbunø købigwan nø maig chiben treeg pønrrønrrai, nun pønrsøbig Tiuswan maig chiben, nøbe treeg pasrønrrab pasramisrtrun, chiyutøgucha kerriguwan Tius nø ashib karub pasrønrrai.

²⁹Pøs trube, ¿tru kwabelayasig piu umbu ulsrailøbe chi martreerah? Tru kwabelø kerriguwan øsiiramønrrab købene, trube, ¿chinchabrre tru kwabelaimburab isua piu umbu ulsrøbelø køh? ³⁰Inchen ¿nambe chu urastøgucha chindimbarre kwam lab pønrrabrah? ³¹Nai nunelø, nabe kwalømmørig ke kwamigu puitø, puitø ka megar. Iibe isatø kømøtø, namui Señor Cristo Jesúsweinug na purø nuig mørøraim pasramibe ñim køn. ³²Pøs møg kuinawa, ka treekkurrindø tru Efesosrøma larrø namig animal lataig inchib misaameraba namig aleguiyab, na treeg marøb megaibe chi marmui lataitøwei webinrrautan. Pøs tru kwabelø katøle øsiiranrrab kømubene, mugøsrøn chibgunrrig, trube:

“¡Mab, muchib inchab køh,
pøs srønato kwamig købashtø!”

³³Ñimbe chi isa køben sruamrramamøtay. Mugøsrøn chibgunrrig: “Kaig marøbeløba linchib pønrraibe tabelø kuigwan ka mindishibig køn.”

³⁴Ñimbe katøle tab chugúi møra sølgandø pønrrønrrab inday, mas kaig

marøb pønrrømøtø. Kaguende møiløbe Tiusweimburabigwane ni maig kuinguen ashmeelø køn. Iigwan na trenchippe, ñimun kwaarøsrøb kørig purørtrab trenchar.

Katøle øsiiraig asrbe øyeeg kønrrabig køn

³⁵Pøs møibe øyeeg chinraabe: “¿Kwabeløbe mandø øsiiranrrerah? cha. ¿Katøle øsiirawa amrruppe, maig asrmera tøgær amrrunrrerah?” cha. ³⁶Kan ñi kui chugúinguen mormíig, kan yellwanma ñi ellguabene, kwamøwabe, øsig kømigwan tøgagønrraamøn. ³⁷Tru ñi ellguappe, tru tusr maig kønrrabigwan ellguamøtø, trulzhigwandø ellguan, tirigu kui lata, kabe katøgan chi peg yell kui lata. ³⁸Pøs Tiusbe i yellwanma chi tusr kønrrai marøppe, nun maig maramdiig køben, treeg marig køn, chi yelldøgucha trumørig chi tusr kønrrabiibe tru tusr kønrrai. ³⁹Chi asrmeratøgucha lata treeg asrmeratø kømøn, kane misag asr køben, kane animalmerai asr køben, kane illimerai asr køben, kane peskaumerai asr køn. ⁴⁰Inchen katø treetøwei srømbala pønrrabelan maig kønrrabelan treeg mariilø køb, katø pirauelan maig kønrrabelan treeg mariilø køb indan. Inchendø tru srømbala pønrrabelai tabzhig tør pilabiibe katøgan køben, yu pirau pønrrabelai tabzhig tør pilabiibe katøgan peemayig køn. ⁴¹Inchen nøsigwei tabzhig tør pilabiibe peemayig køben, katø pølwei tabzhig tør pilabiibe peemayig køn. Katø estrellamerai tabzhig tør pilabiibe peemayig køben, tru utu mø estrellamerai tabzhig tør pilabiibe katø peemayig køn. ⁴²Inchawei øyeetøwein køn tru kwabelø katøle øsiiramikkucha. Tru asrwan søriibe treranrrabig køben, katøle truig øsiirabiibe yandø managuen treranrrabig kømøtø køn. ⁴³Yandø chigucha kømíigwan pirau søra trarrig, katøle truig øsiirappe, tør pilab tabig øsiiranrrun. Chigucha martrabgaig pirau søra trarrig, katøle truig øsiirawa kurrappe, maramburab marøbig kurrønrrun. ⁴⁴Trendø yu pirau tōga pasrai asrwan sørig, katøle øsiirawa kurrappe, asr espíritu kurrønrrun. Asr yu pirauig køb, katø asr espíritugucha køn.

⁴⁵Katø Tiuswei wamwan pørigugucha treeg chibig køn: “Tru srøsrø mōg Adánbe kan misag øsiguig misrig køn” cha. Inchen Adán tru Srabe Arrubig, Jesucristobe, espíritu køn, nøbe øsig kømigwan tranøbig. ⁴⁶Inchawei espírituimburabiimerrig arrumøtø, asr trendø maig kønrrabig truimerrig arruben, trugurrimbe yandø espírituimburabig arrig køn. ⁴⁷Tru srøsrø mōøbe pirøtōga marig yu pirauig køben, tru wendau mōøbe srømbalasrø Tiusweisriig køn. ⁴⁸Inchawei tru pirøtōga mari mōg maig købig køben, yu piraueløbe treeløtøwein køn. Inchen tru srømbalasrø mōg maig køben, tru srømbalasreeløbe truig lataitøwein køn. ⁴⁹Yu pirau mōg maig køben, nam treelø kømigwanma tōgagúibe, katø tru srømbalasrø mōg maig køben, nambe truig lataitøwei kømigwangucha tōgagømønrrun. ⁵⁰Inchawei nabe, nai nunelan, trendamønrrun: Tius nø ashib karub waigwane asr yaumbaig animbañauibe chinchá tōgagønrrab

kaimanrrun cha. Katø tru trerawa patsønrrabiibe tru mana trerab patsønrrabig kòmígwane chinchá nebua tøgagønrrab kaimanrrun cha.

Tru kwamigwan yandø srabe kanawa puraambamig

⁵¹ ¡Au! mòmbe kan chigøsrøn mu asiimíg sorig pasrabigwan na ñimun eshkanrrab inchar: Nambe ke mayeeløbabe kwamig kòmønrrab køn cha. Inchendø nambe mayeeløba yandø kerriguwan peemayelø kønrrai yunømarilø kòmig kønrrun, ⁵² ¡katø! mõi mõi, kan kab kasrøb lataitøgue, tru trompeta srabe urrig wanrrøben. Kaguende trompeta wanrrøbene, kwabeløbe øsiirangaruilø kønrrun katøbe managuen treranrrabelø kòmíkke. Inchen nambe mayeeløba yandø kerriguwan peemayelø kønrrai yunømarilø kòmig kønrrun. ⁵³ Kaguende tru treranrrab asrbe trerab minchabgaitøga pinøbulig kønrrain køben, katø iig tru patsønrrabigwane tru patsønrrabgaitøga pinøbulig kønrrain køn. ⁵⁴ Inchen tru treranrrabigwane yandø tru managuen trerab minchabgaitøga pinøbulig køb, katø iig tru patsønrrabigwane tru managuen patsønrrabgaitøga pinøbulig kørromisrøb inchene, iig tru øyeeg cha pøra pasriibe yandø treeg neburrun: “Tru kwamigwane yandø kanawa kenaguen kòmígwane, pinisan” taig.

⁵⁵ “¿Ñi, kwangarub pasrabig, ñi kanawa pasraibe mòmbe chu pasra? taig. ¿Ñi, kwangarub pasrabig, ñi pusrkwananøb pasraibe mòmbe chu pasra?”

⁵⁶ Kaguende tru kwamigwei pusrkwangarub pasrabiibe tru kaig marig, truig køn. Inchen tru kaig marig maramburab marøbiibe tru maig maramigwan martrai Moisés pørig, truig køn. ⁵⁷ Inchendø Tiuswan ‘mayanguen ungwa, ungwa’ chinrrab, namui Señor Jesucristogurri nam kerriguwan kanawa pønrramig kønrrai tranigwan.

⁵⁸ Inchawei treeg købene, nai undaaraig nunelø, kørønrrabgaig mur pønrrab, mumaygucha wemaløsrkønrraingaug pønrrab, chu uratøgucha Señorwei marameløyube katøguchinguen, katøguchinguen marøb melay, kaguende Señorweimburabeløyu ñim nøba marøb melaibe, ka treeg marøb melaitø puraimønrrab kui ashabe.

Jerusalénsrø Tiuswei misaameran purugumig an utig

16 ¹ Tru Jerusalénsrø Tiuswei misaamerayasig an purugúig utamigweimburappe, tru Galacia pirausrø iglesiameran na mandø martrai karua pønnsraig køben, ñimgucha treetøwei martrigay. ² Ñim møitøgucha an maya tulishabe, truyugurri tarømara, esegab amrrigay truaalømmørig, na trusrø puben, ñim ke møin tulishib mendaptindamig kòmønrrai. ³ Incha ñim møilan karua øramdeelo kui asha kørømarilian, na trusrø puabe, tru Jerusalénsrømay trana øramig ñim an ketigwan nømun trana ørøppe, kan kilga pøra, tøga trana øramønrrun, tru i karua øriiløbe chi isumga møguelø kui nøm ashchai. ⁴ Inchen naimburab nagucha yamig søl kønrraptiig købene, trube, na iben, nømbe naba amrrunrrun.

Pablo nui lincha amrrabeløba mandø ambamigwan wamindig

⁵Nabe Macedonia pirauwansrø pureb arrua, yandø ñimuisrø pumønrrun, kaguende nabe Macedoniawansrø pureb yamig kua. ⁶Inchippa kan maya yanagatig kørømisrisruandøbe, ñimba ka kørømisramønrrun, kabe tru pishim põlmera chab purayamnegatikken, nan chumay yamig nebuben, nai yamigu ñim purugumig kønrrai. ⁷Kaguende møyimbe ñimun ke ka petø asha purainrraptø arrug kømøtan. Pøs Señor nan treeg kønrrain købene, kan maya yanagatig ñimba kørømisrtrab attrab isur. ⁸Inchendø Pentecostés kwaløm pumnegatig nabe yu Efeso kørømisrtrab kur. ⁹Kaguende yube kan yaskab purø nuig nayasig kurin køn, Tiusweiwan wamindig nu larrøbichaptiikke. Inchendø marmønrrai nan sötølulrrabelø truba truba køn.

¹⁰Inchippa Timoteo trusrø pubene, ñimui utu chi kørig kui inchimønrrai inchigay. Kaguende nøgucha Señorwei marameløyu na lataitøwei marøb megabig køn. ¹¹Inchawei nune møyitøgucha palabinøtø inchib kønrrab kømø, masken chi isumø inrrai purugua ørtrigay, naimay katø attrai. Kaguende nabe namui nunelanba, nunba munig megar.

¹²Inchen namui nuneg Apolosweimburappe, tru nunelø ñimuisrømay amrrabeløba nungucha na tiusmanda maya lincha irra taingucha, møyibatøbe nøbe chi inrrab inchimøn. Inchendø nun chu uras yamig pubene, inrrab kuinrrun.

Maig amønnamigwan treeg melønrrai wamindiiløba, ‘ka amøñiguh’ tailøba

¹³Tab ashiptø pønrray. Pesan amøñimøtø, isubigwan Cristoinug tøga pasra pønrraigu mur pønrrab, chishkandø møgueløsun pønrrabelø køb, trurrigu murelø kuy. ¹⁴Incha chiwandøgucha ñim marøppe, undag købiitøga maramig køn.

¹⁵Nai nunelø, ñimbe ashibelø køn tru Acaya pirausrø Estéfanaswei yaeløbe ke srosrøzhiitø nømmerrig Tiuswan nebua ashibelø misra, Tiuswei misaameran nømbe purugunrrab pønrramisrigwan. ¹⁶Inchawei nabe ñimun øyeeg melørrunrrigay chinrrab inchar, tru øyeeg melabelane nøm maig chiben mørøb melønrrigay cha, katø tru mayeelø i maramigwan purugub marøb melabelan treetøweingue.

¹⁷Nane truba kasrag køtan Estéfanas køben, Fortunato køben, Acaico køben amrruin køben. Kaguende ñim mu kaagua, purugunrrab kaimaigwan nømbe nan purugua, ¹⁸pøs truiløbe nai isubigu lata, ñimui isubigu lata chi isumikkaig, tab kønrrai marig køn. Øyeeg møgueløbe mayanguen tab indig kønrrabelø køn.

‘Ka amøñiguh’ taiba, ‘ungwa’ taiba

¹⁹Tru Asia pirausrø iglesiamera ñim corintosreelan ‘ka amøñiguh’ cha øran. Aquilaba, Priscilaba, katø iglesia nømui yau tulundzunabelø, truilø chigucha Señorwei munchiyu ‘mayanguen tab ka amøñiguh’ cha øran.

²⁰Katø mayeelø nuneløgucha ñimun ‘ka amõñigueh’ cha øran. Ñimbe kangurrin kangurri ‘ka amõñigueh’ chib, Tiuswei undag købiitøga tasig traniyay.

²¹I ‘ka amõñigueh’ taigwan na Pablo ñimun naashib nai taska pørar.

²²Møikkøben Señørwan undaguig kømígwane Tiuswei namig købig nuim pala købash. ¡Namui Señor Jesucristo amø!

²³Señør Jesúswei tru ka yandø tab indiibe ñimba pasrønrrai inchar.

²⁴Cristo Jesúsweinug nai undag købiibe ñim mayeeløba pasrønrrun. Treg kønrrun.